

四書經注集證

宋大儒定著四子書數百年功令所垂制義一途無不望的以趨承學之士先後從事於其書者層見迭出今具於續文獻通考經義考二書有可指數其目者殆不下五六百家其餘時師之講習鄉塾之抄撮尙不在其內可謂博矣綜其異趣大抵言義理者十之九言故實者十之一然一義理也而格致之說陽明與朱子互岐一故實也而禘祫之議子邕與康成爭勝若其他微文散義之牴牾者未易終窮而門戶黨援之習浸成於學士大夫之私意或反假四子書以爲之端是韓子所譏不合不公者也善乎

昭代大儒陸清獻公之言曰四書自經朱子訂定便如大禹平成天地一番後來者無容置喙此誠足以息鬯競而正趣向矣然言義理而極之誠正脩齊治平天人性命之秘奧言故實而極之典

章制度古今沿革是非之變與夫星官卜祝草木蟲魚之類無不  
錯出其間是四書雖爲童孺口傳之業而實統滙條貫乎六經子  
史固宜

國家著爲功令羣天下後世之通人鉅儒殫心力事編纂窮老盡  
氣以冀幸其有一言之合者其托業甚大且要寧區區資帖括者  
勦襲之具云乎哉夫天下英奇蔚起五車四庫之書可遍觀而盡  
識也九流百家之說可旁咨而博攷也辨貳負鼯鼠之恢奇析琅  
琊汪張之淵奧往往目不見睫如王伯厚所記東坡解孟莊子之  
孝爲獻子雖三尺童子亦必哆口而笑之矣然則章梳句比窮源  
引委近於學究所云云者自其出就外傳之初馴而習之以爲異  
日治聞殫見之基庸非汲引來學之盛心歟同里汪子石潭緘寄

蘇州吳文園先生所輯四書經註集證因受而卒讀之詳於故實而盡去其傳會義理循聲模響之習其注名物訓詁於本句之下并及朱子所引成語者則本元詹氏纂箋之例而廣之其博引古今人物出處而各列其原書者則本明薛氏人物考之例而變通之大旨一本朱子而後來考辨之精與其沿襲之誤確然有可依據者閒亦採入一二凡以期于是而已先生竭數十年採錄別擇之勤手輯是書意以砭義理空疎之失而爲談故實者息穿鑿攻擊之私學者童而習之白首而昧其解者比比也則是書之爲功豈淺鮮哉汪子旣刻以廣其傳并屬一言先之故爲道其原流分合之故以不沫作者之旨而并以見汪子殷殷嘉惠之誠善學者誠由此以得其大義微言之所在抑又不妨爲筌蹄之棄矣

嘉慶三年歲次戊午夏五月小暑後五日儀徵阮元序

機垂髫讀四子之書章疏句解性愚魯不甚通曉見時俗高頭講章依傍聖賢之言斤斤求肖萬一以彷彿於影響之間其所以爲後學計者至苦而或時喻時不喻卽其稍有開悟者又多不免於空踈之病蓋蒙養之難如此也早事衣食便輟舉業於此事遂從廢置豈復敢以不學未習之身妄作解人比來課兒輩讀書私冀其卒業于此未嘗不留心善本以爲少成習慣之助曾蘇郡吳君子山司教六安因緣接晤什襲其尊甫所輯四書集證出以見示雖無能窺測淵微而以吳下人文之地淵源漸被又殫數十年搜羅纂葺之勤易稿三四垂老不輟殷殷嘉惠後學之盛心欲以使天下窮鄉僻壤開卷瞭然得緣以識古今名物之繁自其童年之朝孺夕染而早喻之也則由此以進於大成不可謂非先入之主

其賢於空疎者遠矣因爲抄錄一通以質同里諸先生重加是正  
付諸梓氏旣以公吳先生之學於當世而區區期望來學之私亦  
於是乎在刻旣成爲述其緣起時嘉慶三年四月廿四日江都汪  
廷機識

四書經註集證凡例

一四書自南宋以來諸家義疏盛起後衍爲講章通計不下千餘家醇雜偏全皆于理發揮無餘矣是編惟詳典實故並不  
及

一方山薛氏始爲四書人物考其後簡臣王氏之四書徵伯敬鍾氏之圖史合考明卿陳氏之人物備考海虞陳氏之名物考人物槩應城陳氏之論語類考孟子雜記率不下數十餘種博考旁搜皆極詳備諸書顯晦不同薛氏一書最爲時俗通行而貫合衆說自成一家是編仍標明原引各書使讀者  
知所自來悉可依據

一四書自朱子集註章句出已集諸家之成然于名物訓詁皆



仍先儒舊解最爲審慎後來專門考據始有指摘一二之譌者去攻訐之私而存綜核之義亦大賢所不廢也故是編一遵朱子復閒採其異義者

一象數名物之學沿革愈多考索愈核至顧寧人間百詩江慎修三先生出益臻精詣故是編採葺特衆其有好事新奇自立意見以樹幟者槩不敢錄入

一四書皆三代以上事今自五經三禮三傳及國語國策所述典制人物並相佐證其先秦諸子及後出諸書畧取馬氏釋史之意兼錄其雅馴者以廣見聞

一是編倣四書纂箋之例於朱註所用成語各證其出處其所引史傳亦各具本末

一山川郡邑諸志歷代相沿閒多傳會今必擇其近是者其或偶在疑似之間亦並錄以備考非敢臆斷

一鳥獸蟲魚草木之箋並有專書考析至詳今各依類采入遇物能名非敢辭繁

一朱子于白文下各存音釋本之陸氏釋文從註疏之例也然傳本互有異同今一據舊本爲準閒有與俗異者

一人物有先後重見者義類各殊亦並依本旨分錄仍注明餘見某處

一朱註所引先儒祇稱某氏後學每不識爲何人元儒胡炳文四書通臚于篇首亦祇及名字里居今各依文輯注詳其生平有一二無可考者則闕之

四書章句  
二  
一經中所分章節向來注釋家但詁大意或有分章不分節者  
今一本朱子爲定閒有依文分注詞涉繁多不得已偶有離  
析期于比附親切非敢妄分章節也

一聖賢立言宗旨務以明理爲先然名物不審訓詁不確則理  
亦無由可見此俗學孤陋浸流而爲空疎也是編爲初學起  
見若大雅宏博之士儘可馳騁百家含茹衆有至于神明會  
通更不妨爲筌蹄之棄惟是罣漏旣多折衷鮮當識者幸有  
以教之

乾隆四十五年庚子二月朔日吳趨吳昌宗識

先君子從事四子之書採錄搜葺幾殫一生心力

天佑

少受庭訓

習見丹黃編次歷寒暑窮日夜不休比寫有成書卷帙繁重無力付梓而於殷勤誘啟之意拳拳尙有待也風木含悲驅馳不息珍護遺編手澤所存憮然增恨會吾友汪石潭見之深加歎賞爲鋟板維揚石潭嘉惠來學之心爲近世所希不特先人隱願藉此獲伸卽不肖如天佑亦得稍釋其弗克負荷之愧云刻旣成謹附志數語于末嘉慶三年戊午三月朔日男天佑百拜跋

# 孔子弟子考

按鄭康成孔子弟子目錄久不傳史記傳七十七人索隱謂孔子家語亦有七十七人家語不載公伯寮秦冉鄒單而別有琴牢陳亢縣豐此係舊本家語今所行王肅家語僅七十六人文翁孔廟圖七十二人中有林放蘧伯玉申枨申堂則增損又不同矣唐會要所載及禮樂志開元贈典並七十七人其姓名與史記同惟通典于十哲外更列七十三人則增入蘧瑗林放陳亢申枨琴牢琴張六人也蘇轍古史著錄七十九人自謂通史記家語所不載者而兼錄之然取今王肅本家語與史記參校其名字之參差歧出者甚多近代朱彝尊孔子弟子考最爲綜博孔昭煥闕里文獻考附集諸書所載增多十有四人今以史

記爲主其餘皆附列而于各家傳會論辨之煩及名字多少形似之處不多及焉

顏回字子淵魯人少孔子三十歲

閔損字子騫魯人少孔子十五歲今家語誤作五十歲

冉耕字伯牛魯人闕里廣志云少孔子七歲

冉雍字仲弓魯人索隱曰家語云伯牛之宗族少孔子二十九歲

冉求字子有魯人少孔子二十九歲今家語云仲弓之宗族

仲由字子路卞人一字季路少孔子九歲

宰予字子我魯人

端木賜字子貢衛人少孔子三十一歲

言偃字子游吳人少孔子四十五歲今家語作三十五歲

卜商字子夏衛人少孔子四十四歲

顓孫師字子張陳人少孔子四十八歲

曾參字子輿南武城人少孔子四十六歲

澹臺滅明字子羽武城人少孔子三十九歲

宓不齊字子賤魯人少孔子四十九歲索隱曰家語少孔子三十歲今家語作少四十歲

原憲字子思魯人索隱曰家語云宋人少孔子三十六歲

公冶長字子長齊人索隱曰家語云魯人名萇范甯云字子芝南宮括字子容索隱曰家語作南宮縚魯人

公皙哀字季次索隱曰家語作公皙克齊人今家語作字季沈曾蒧字皙曾參父

顏無繇字路顏回父少孔子六歲

商瞿字子木魯人少孔子二十九歲

高柴字子羔少孔子三十歲衛人正義曰家語云齊人今家語云高氏之別族少孔子四十歲禮記作子臯左傳作季羔

漆彫開字子開魯人正義曰家語云蔡人字子若少孔子十一歲公伯寮字子周馬融曰魯人正義云家語有申繚子周

司馬耕字子牛宋人

樊須字子遲齊人少孔子三十六歲正義曰家語云魯人今家語少孔子四十六歲

有若少孔子十三歲正義曰家語云字有少孔子三十三歲今家語作少孔子三十六歲



公西赤字子華魯人少孔子四十二歲

巫馬施字子旗魯人少孔子三十歲今家語作陳人字子期

梁鱣字叔魚齊人少孔子二十九歲今家語少孔子三十九歲

顏幸字子柳魯人少孔子四十六歲

冉孺字子魯魯人少孔子五十歲魯一作曾

曹卹字子循少孔子五十歲文獻考云蔡人

伯虔字子析少孔子五十歲正義曰家語云子皙又曰子循

公孫龍字子石楚人少孔子五十三歲正義曰家語云衛人孟子

曰趙人

冉季字子產魯人

公祖句

音鉤茲字子之今家語作公祖茲

秦祖字子南秦人

漆雕哆字子斂魯人

顏高字子驕今家語作顏刻魯人少孔子五十歲

漆雕徒父今家語作漆雕從字子文一作子友

壤駟赤字子徒今家語作穰駟赤字子從秦人

商澤字子季今家語作子秀魯人

石作蜀字子明宋贈成紀侯

任不齊字選楚人

公良孺字子正陳人

后處字子里齊人今家語后誤石

秦冉字開正義云家語無此人

公夏首字乘魯人今家語作公夏守字子乘

奚容蒧字子皙今家語作奚蒧字子楷正義云衛人

公堅定字子中鄭康成曰魯人或曰晉人古史堅作肩

顏祖字襄今家語作顏相字子襄魯人文獻考云古本家語無此人

鄒單字子家

句井疆衛人

罕父黑字子索今家語作宰父黑

秦商字子丕索隱云家語魯人字丕慈少孔子四歲秦堯父之子

鄭康成曰楚人

申黨字周魯人

顏之僕字叔魯人

榮旂字子祺魯人

縣成字子祺魯人

左人郢字行魯人今家語作左郢字子行

燕伋字思

鄭國字子徒正義曰家語云薛邦字徒史記作國者避高祖諱薛

字與鄭字誤耳

秦非字子之魯人

施之常字子恆魯人

顏噲字子聲魯人

步叔乘字子車齊人

原亢籍家語曰名亢字籍

樂欬字子聲魯人

廉絜字庸今家語作子曹衛人

叔仲會字子期晉人索隱曰家語魯人少孔子五十四歲

顏何字冉魯人索隱曰家語字稱

狄黑字皙

邾吳字子斂魯人索隱云曰家語作選文翁圖作國選蓋亦避漢諱改之

孔忠字子蔑孔子兄孟皮之子古史作孔弗

公西輿如字子上

公西蒧字子上索隱曰家語作子尙魯人

以上共七十七人皆本史記仲尼弟子列傳自公孫龍以上三十五人頗有年名及受業聞見于書傳其冉季以下四十人無年及不見書傳者紀于後今惟顏高秦商叔仲會三人據家語諸書補其年

琴牢字子開一字子張衛人史記無

陳亢字子亢一字子禽陳人少孔子四十歲說文亢作伉史記無縣亶字子象索隱作縣豐廣韻注作縣亶父魯人史記無或云卽史記之鄒單也

以上三人本家語外與史記記者七十三人共七十六人

林放魯人

蘧伯玉名瑗衛大夫

申枨見論語

申堂

以上四人本文翁孔廟圖按索隱云此俱是後人以所見增益今殆不可考

牧皮見孟子

仲孫何忌魯大夫孟僖子之子諡懿子見左傳

仲孫說亦僖子子諡敬叔見左傳

孺悲見禮記雜記

公罔之裘見禮記射義

序點見禮記射義

孔璇見家語

惠叔蘭見家語

常季見莊子

鞠語見晏子

顏涿聚史記作顏濁鄒孟子作顏讎由

廉瑀見文翁石室

魯峻見文翁石室

子服何見石壁書卽論語子服景伯也

以上十四人本文獻考所集

賓牟賈見禮記樂記

左丘明諸儒如班固杜預劉知幾之屬皆謂親受經孔子

以上二人本朱彝尊孔子弟子考



孟子弟子考

按宋政和五年詔定鄒縣孟子廟配享從祀皆擬封爵悉本趙注惟少滕更一人爲十八人元吳萊有孟子弟子考今已不傳有序在文集中自朱子集註出而季孫子叔二人始廢然萊在朱子後猶尙稱十九人也張九韶羣言拾唾載孟子十七弟子去季孫子叔滕更益成括而益以孟季子周霄朱彝尊經義考亦去季孫子叔而謂告子與浩生不害是二人因去告子而列浩生不害宮夢仁讀書紀數畧則易滕更浩生不害益成括爲孟季子告子周霄數同而人異今以趙注爲本而並錄其他見者

趙注弟子十五人

樂正子

公孫丑齊乘滕州北公村有墓

陳臻

公都子

充虞

季孫

子叔

高子齊人王伯厚云小弁章高子孟子以叟稱之與去齊時以尹士語告者當另一人

徐辟

咸丘蒙

陳代

彭更

萬章齊乘滕州南萬村有墓

屋廬子

桃應

趙注學于孟子四人

孟仲子

告子

滕更

盆成括

各書別見者

史記索隱孟子有萬章公明高等蓋並門人也

呂氏春秋注匡章孟子弟子

淮南子注陳仲子齊人孟子弟子

廣韻孟子門人有離婁

四書經註集證

大學章句序

意斷曰章言斷曰句章句之說起於漢儒前漢藝文志有歐陽章句大小夏侯章句公羊章句穀梁章句等篇又揚雄傳雄少而好學不為章句訓詁通而已儒林瑕丘江公傳受左氏傳取其變理合者以為章句韻會敘通作序爾雅序疏敘陳此經之旨如孔子作書序子夏作小序是也

大學之書

四書考大學者小戴四十九篇之一也或謂作於曾子或謂作於子思唐以前未有表章之者宋仁宗天聖八年始以此篇賜新第王拱辰等嗣後朱子為之章句或問以釋之遂與中庸獨行於世云古木大學原無經傳之分其章次亦與今異宋儒疑有錯簡各以其意更之今所定蓋本伊川程子而經傳之分則朱子為之也

古之大學所以教人之法也

禮王制天子命諸侯教然後為學小學在公宮南之左大學在郊天子曰辟雍諸侯曰頤宮餘見後

蓋自天降生民則既莫不與之以仁義禮智之性矣然其氣質之稟或不能齊是以不能皆有以知其性之所有而全之也一有聰明睿智能盡其性者出於其閒則天必命之以爲億兆之君師使之治而教之以復其性

書泰誓受有億兆夷人左傳閔公二年上偃曰天子曰兆民諸侯曰萬民風俗通千生萬萬生億億生兆兆生京京生秭秭生垓垓生壤壤生溝溝生澗澗生正正生載載地不能載也韻會十萬爲億十億爲兆禮內則降德於衆兆民疏算法有大小二數小數以十爲等十萬爲億十億爲兆也大數以萬爲等是萬萬爲億萬萬億爲兆也按朱子註孟子其麗不億云十萬爲億註周頌萬億及秭云數萬至萬曰億蓋兩取其說

### 此伏羲神農黃帝堯舜

史記三皇紀太皞庖犧氏風姓代燧人氏繼天而王母曰華胥履大人跡於雷澤而生庖犧於成紀蛇首人身有聖德仰觀象於天俯觀法於地旁觀鳥獸之文與地之宜近取諸身遠取諸物始畫八卦以通神明之德以類萬物之情造書契

以代結繩之政於是始制嫁娶以儷皮爲禮結網罟以教佃  
漁故曰宓犧氏養犧牲以庖廚故曰庖犧氏有龍瑞以龍紀  
官號曰龍師作二十五絃之瑟以木德王主春令月令孟春  
其帝太皞是也都於陳東封泰山立十一年崩神農詳孟  
子更記五帝紀黃帝者少典之子姓公孫名軒轅生而神靈  
弱而能言幼而徇齊長而敦敏成而聰明軒轅之時神農氏  
世衰諸侯相侵伐暴虐百姓神農氏弗能征于是軒轅乃習  
用干戈以征不享諸侯賓從而蚩尤最爲暴莫能伐炎帝欲  
侵陵諸侯諸侯皆歸軒轅軒轅乃修德振兵教熊羆貔貅組  
虎以與炎帝戰於阪泉之野三戰然後得志又與蚩尤戰於  
涿鹿之野遂禽殺蚩尤而諸侯咸尊軒轅爲天子代神農氏  
是爲黃帝天下有不順者黃帝從而征之披山通道未嘗寧  
居以師兵爲營衛官名皆以雲命爲雲師置左右大監監于  
萬國萬國和而鬼神山川封禪與爲多焉獲寶鼎迎日推策  
舉風后力牧常先大鴻以治民有土德之瑞故號黃帝黃帝  
二十五子其得姓者十四人居軒轅之丘而娶于西陵之女  
是爲嫫祖嫫祖爲黃帝正妃生二子其後皆有天下黃帝崩  
葬橋山通鑑綱目前編黃帝有熊氏立六相暨史官立占天  
官命大撓作甲子命容成作蓋天及調歷命隸首作數命伶  
倫造律呂命榮援作十二鐘命大容作咸池之樂作冕旒正  
衣裳作器用作舟車作合宮作貨幣作內經命元妃西陵氏  
教民蠶畫野分州經土設井屈軼生于庭鳳凰巢於閭麒麟

遊於園帝崩于荆山之陽  
堯舜詳傳第九章

### 所以繼天立極

穀梁傳繼天者君也漢書五行志宓戲氏繼天而王受河圖則而畫之八卦是也列子女媧氏斷鼃足以立極

### 而司徒之職典樂之官所由設也

書舜典帝曰契百姓不親五品不遜汝作司徒敬敷五教在寬註司徒教官之長周官司徒掌邦教敷五典擾兆民書舜典夔命汝典樂教胥子直而溫寬而栗剛而無虐簡而無傲詩言志歌永言聲依永律和聲八音克諧無相奪倫神人以和周禮春官大司樂掌成均之法以教國子弟註大司樂教官之長即唐虞后夔之職也禮王制大樂正論造士之秀以告王而升諸司馬

### 三代之隆其法寢備然後王宮國都以及閭巷莫不有學

周禮冬官匠人王宮門阿之制五雉宮隅之制七雉城隅之制九雉周禮地官大司徒日南至之景尺有五寸謂之地中天地之所合也四時之所交也風雨之所會也陰陽之所和也百物阜安乃建王國焉冬官匠人營國方九里旁三門國中



九經九緯經涂九軌左祖右社前朝後市問巷詳論語

# 人生八歲則自王公以下至於庶人之子弟皆入小學

白虎通辟雍篇古者所以年十五入大學何以為入歲毀齒始有識知入學學書計七八十五陰陽備故十五成童志明入大學學經術大戴記保傅篇古者年八歲出就外舍學小藝焉履小節焉束髮就大學學大藝焉履大節焉尚書大傳王太子王子羣后之子以至公卿大夫元士之適子十有三年始入小學二十入大學按年數互異朱子從白虎通

## 而教之以灑掃應對進退之節禮樂射御書數之文

灑掃應對進退詳論語禮內則子生六年教之數與方名十年出就外傳居宿於外學書計衣不帛襦袴禮帥初朝夕學幼儀請肄簡諒十有三年學樂誦詩舞勺成童舞象學射御二十而冠始學禮可以衣裘帛舞大夏周禮地官大司徒以鄉三物教萬民而賓興之其三曰六藝禮樂射御書數保氏掌教國子以道乃教之六藝一曰五禮二曰六樂三曰五射四曰五御五曰六書六曰九數鄭康成註五禮吉凶軍賓嘉也按吉禮事邦國鬼神祇之禮也凶禮以喪禮哀死以荒禮哀凶札以弔禮哀禍裁以贈禮哀圍敗以賙禮哀寇亂也軍禮大師大均大田大役大封之禮也賓禮親邦國之禮

也嘉禮飲食昏冠賓射饗燕朕臚質慶之禮也 六樂雲門  
大咸一日咸池大韶大夏大濩大武也 按雲門黃帝樂言  
德如雲出能畜物也大咸堯樂言德能大中國也大濩湯樂言德能  
德紹乎前也大夏禹樂言德能大中國也大濩湯樂言德能  
救護民也大武武王樂言德能成武功也 五射白矢參連  
剡注襄尺并儀也 按白矢者矢貫在侯而侯背見其鏃白  
也參連者前發一矢後二矢連而去也剡注者矢行勁直剡  
剡然注于的也襄尺者襄作讓臣與君射讓君一尺而退立  
也并儀者四矢貫侯狀如井也 五御鳴和鸞逐水曲過君  
表舞交衛逐禽左也 按鳴和鸞者和在式鸞在衡聲相應  
也逐水曲者車行水畔隨其勢而屈曲也過君表者即穀梁  
傳所謂流旁握而御不擊也舞交衛者車在交衢旋舞中節  
也逐禽左者驅禽當君之左使君射之也 六書象形會意  
轉注指事假借諧聲也 按象形如日月類象其形也會意  
如人言爲信止戈爲武會其意也轉注如老考之類首文相  
同而其下左右轉相注也指事如人在一上爲上人在一下  
爲下各指其事也假借如令長之類一字而兩用也諧聲如  
江河之類以水爲形以工可爲聲也 九數方田粟米差分  
一日衰分少廣商功均輸盈朒一日贏不足方程勾股一日  
旁要也 按方田以御田疇界域粟米以御交質變易差分  
以御貴賤稟稅少廣以御積募方圓商功以御功程積寶均  
輪以御遠近勞費盈朒以御隱雜互見方程以御錯糅正負

勾股以御  
高深廣遠

及其十有五年則自天子之元子眾子以至公卿大夫元士之  
適子與凡民之俊秀皆入大學而教之以窮理正心脩己治人  
之道此又學校之教大小之節所以分也

書微子之命殷王元子註元長也公卿大夫元士詳孟子  
集韻韻會適與嫡同增韻正室所生之子曰嫡子禮檀弓扶  
適子南面而立王制命卿論秀上升之司徒曰選士司徒論  
選士之秀者而升之學曰俊士又王太子王季羣后之太子  
卿大夫元士之適子國之  
俊選皆造焉校詳孟子

夫以學校之設其廣如此教之之術其次第節目之詳又如此  
而其所以為教則又皆本之人君躬行論語躬行君子心得易謙卦鳴  
謙貞吉中  
之餘不待求之民生日用彝倫書洪範天乃錫禹洪  
範九疇彝倫攸敘之外  
是以當世之人無不學其學焉者無不有以知其性分之所固

有職分之所當為而各俛焉禮表記俛焉日有莘莘以盡其力此古昔盛

時所以治隆於上俗美於下而非後世之所能及也及周之衰

賢聖之君不作學校之政不脩教化陵夷風俗頽敗時則有若

孔子之聖而不得君師之位以行其政教於是獨取先王之法

誦而傳之以詔後世若曲禮少儀內則弟子職諸篇固小學之

### 支流餘裔

曲禮少儀內則皆禮記篇名禮之小節繁文曰曲後人以編簡多故有上下篇少儀記相見及薦羞之小咸儀石梁王氏

曰非幼少之少此篇曲禮之類閨門之內禮儀可則曰內則弟子職管子篇名管仲所著類篇支分也玉篇支離自異正

韻裔胄也簡漢藝文志小說篇合其要歸亦六經之支與流裔師古註裔衣末也其於六經如水之下流衣之末裔

而此篇者則因小學之成功以著大學之明法外有以極其規

模之大而內有以盡其節目之詳者也三千之徒更記孔子世家以詩書禮

樂教弟子蓋三千焉蓋莫不聞其說而曾氏之傳獨得其宗於是作為傳義以發其意及孟子沒而其傳泯焉則其書雖存而知者鮮矣自是以來俗儒記誦詞章之習其功倍於小學而無用異端虛無寂滅之教其高過於大學而無實

老子去用章天下之物生于有有生于無莊子人間世惟道集虛漢書藝文志道家無為又云其實易行其辭難知其術以虛無為本華嚴經佛在摩竭提國寂滅道場始成正覺程子曰道家虛無佛氏寂滅

### 其他權謀術數一切以就功名之說

漢書藝文志權謀者以正守國以奇用兵先計而後戰兼形勢包陰陽用技巧者也數術者皆明堂義和史卜之職也史官之廢久矣其書既不能具雖有其書而無其人易曰苟非其人道不虛行春秋時魯有梓慎鄭有裨竈晉有卜偃宋有子韋六國時楚有甘公魏有石申夫漢有唐都庶得龜蓍蓋有因而成易無因而成難故因舊書以序數術為六種

與夫百家眾技之流所以惑世誣民充塞仁義者又紛然雜出

乎其間

漢書藝文志有儒家者流道家者流陰陽家者流法家者流名家者流墨家者流從橫家者流雜家者流農家者流小說家者流小說十五家內百家百三十九卷韓愈進學解手不停披於百家之編

使其君子不幸而不得聞大道之要其小人不幸而不得蒙至治之澤晦盲否塞反覆沉痼以及五季之衰而壞亂極矣

按五季之名始見宋史地理志唐室既衰五季迭興五十餘年更易八姓謂後五代梁唐晉漢周也謂之五季者本左傳晏平仲此季世也之語以五代禍亂相尋國祚短促故稱季也後梁姓朱氏初宋州陽山人朱溫從黃巢為盜既而降唐拜為宣武軍節度使賜名全忠未幾進封梁王挾天子以號令諸侯竟移唐祚傳一世後唐兵來伐國亡共二主合一十七年後唐姓李氏初沙陀人朱邪赤心事唐有功賜姓李氏至子克用滅黃巢封晉王孫存勗襲封以兵滅梁稱帝號曰後唐傳二世石敬瑭以兵入洛陽國遂亡共三主合一十三年後晉姓石氏初沙陀人石敬瑭為後唐明宗之婿與潞王有隙乃借契丹兵以滅唐稱帝建國號曰後晉傳一世後為契丹所滅而國亡共二主合一十一年後漢姓劉氏初沙陀

人劉知遠仕晉以功封平北王及晉王重貴為契丹所虜知遠乃即帝位於晉陽建國號曰後漢傳一世及郭威舉兵反隱帝為亂軍所弑而國亡共二主合四年後周姓郭氏初耶州堯山人郭威仕漢為樞密使及隱帝遇害將士擁而立之建國號曰後周傳二世禪位於宋而國亡共三主合十年

天運循環

史記高祖贊三

無往不復

易泰卦無往不復

宋德隆盛治教

休明

宋史太祖姓趙氏涿郡人父宏殷母杜氏周顯德中宏殷累官檢校司徒太祖生于洛陽夾馬營赤光繞室周祖以樞密使征李守貞應募居帳下世宗即位典禁兵累拜檢校太傅殿前都點檢恭帝即位契丹入寇命出師禦之次陳橋驛軍士以黃衣加太祖身羅拜呼萬歲太祖肅隊以入改元建隆定國號曰宋都於大梁

於是河南程氏兩夫子出而有以接乎孟氏之傳實始尊信此

篇而表章

漢書武帝贊表章六經

之既又為之次其簡編發其歸趣然後

古者大學教人之法聖經賢傳之指粲然

荀子非相篇欲觀聖王之跡則於其粲然

明者矣註然復明於世

河南即今河南省之河南府昔武王定鼎郊廓成王營洛爲  
王城下都平王自鎬京東遷乃居王城秦置三川郡漢曰河  
南後魏改洛州唐爲東都宋名西京明置河南府隸河南省  
其附郭屬縣曰洛陽伊水洛水皆經其地即二程夫子所居  
也故世稱濂洛關閩以洛指程而號正公曰伊川先生焉宋  
史道學傳程顥字伯淳世居中山後徙開封河南高祖羽太  
宗朝三司使父珣仁宗錄舊臣後以爲黃陂尉顥資性過人  
充養有道和粹之氣益於面背門人交友從之數十年亦未  
嘗見其忿厲之容遇事優爲雖當倉猝不動聲色自十五六  
時與弟頤間汝南周敦頤論學遂厭科舉之習慨然有求道  
之志泛濫於諸家出入於老釋者幾十年返求之六經而後  
得之秦漢以來未有臻斯理者卒年五十四文彥博題其墓  
曰明道先生嘉定十三年賜諡純公淳祐元年封河南伯從  
祀孔子廟庭程頤字正叔於書無所不讀其學本於誠以大  
學語孟中庸爲標指而達於六經動止語默一以聖人爲師  
張載稱其兄弟從十四五時便脫然欲學聖人故卒得孔孟  
不傳之學以爲諸儒倡其言之指若布帛菽粟然知德者尤  
尊崇之著易春秋傳以傳於世平生誨人不倦故學者出其  
門最多淵源所漸皆爲名士世稱伊川先生卒年七十五嘉  
定十三年賜諡正公淳祐元年封伊陽伯從祀孔子廟庭



雖以熹之不敏亦幸私淑而與有聞焉

宋史道學傳朱熹字元晦一字仲晦徽州婺源人父松字喬  
年中進士第除秘書省正字出知饒州未至卒熹幼穎悟南  
能言父指天示之曰天也熹問曰天之上何物松異之就傳  
授以孝經一閱題其上曰不若是非人也嘗從羣兒戲沙上  
獨端坐以指畫沙視之八卦也年十八貢於鄉中紹興十八  
年進士第主泉州同安簿孝宗卽位詔求直言熹上封事除  
知南康軍周必大相除熹提點江西刑獄光宗卽位再辭職  
改知漳州寧宗卽位趙汝愚首薦熹除煥章閣待制侍講四  
年熹以年近七十申乞致仕五年依所請明年卒年七十一  
疾且革手書屬其子及門人范念得黃幹拳拳以勉學修正  
遺書爲言翼日正坐整衣冠就枕而逝熹登第五十年仕於  
外者僅九年立朝纔四十日家故貧少依劉子羽寓建之崇  
安後徙建陽之考亭簞瓢屢空晏如也諸生之自遠而至者  
豆飯藜羹率與之共往往稱貸於人以給用而非其道義則  
一介不取也旣沒詔賜熹遺表恩澤諡曰文理宗寶慶二年  
贈太師追封信國公改徽國其學大抵窮理以致其知反躬  
以踐其實而以居敬爲主嘗謂聖賢道統之傳散在方策聖  
經之旨不明而道統之傳始晦于是竭其精力以研窮聖賢  
之經訓所著書有易本義啟蒙著卦考謨詩集註大學中庸  
章句或問論語孟子集註太極圖通書西銘解楚辭集註辨

證韓文考異所編次有論孟集議孟子指要中庸輯略孝經刊誤小學書通鑑綱目宋名臣言行錄家禮近思錄河南程氏遺書伊洛淵源錄皆行於世熹沒朝廷以其大學語孟中庸訓說立於學官又有儀禮經傳通解未脫稿亦在學官平生爲文凡一百卷生徒問答凡八十卷別錄十卷淳祐元年正月上視學手詔以周張二程及熹從祀孔子廟熹子在紹定中爲吏部侍郎

顧其爲書猶頗放失是以忘其固陋采而輯之閒亦竊附己意補其闕略以俟後之君子極知僭踰無所逃罪然於國家化民成俗禮學記君子如欲化民成俗其必由學乎之意學者脩己治人之方則未必無小補云淳熙己酉二月甲子新安朱熹序

淳熙宋孝宗年號也孝宗在位二十七年凡三改元隆興二年乾道九年淳熙十六年新安徽州府禹貢揚州之域天文斗分野春秋時屬吳吳亡屬越戰國屬楚秦屬郢郡漢爲丹陽郡地三國吳曰新都晉曰新安隋唐曰歙州宋曰徽州府其屬有婺源縣按李果齋方子撰朱子年譜先生本歙州人世居婺源永平鄉松巖里父韋齋先生松爲政和建寧

屬縣尉遭父喪以方臘亂不能歸遂葬其邑僑寓劍今延平  
府建寧府二州館於尤溪延平屬縣鄭氏而先生生時  
宋高宗建炎四年九月庚寅十四歲章齋歿以先生屬白水  
劉勉之十九歲登進士後二年如婺源展墓至四十七歲再  
如婺源然則朱子始終爲閩人今自謂新安者本其世居者  
而言亦不忘父母之邦耳

大學 大舊音泰今讀如字

朱熹集註

按舊音泰本鄭康成註指其地對小學言也今如字讀乃朱子所更定指其書對小子之學言也東齋記事古者字未有反切故訓釋者但曰讀如某字而已

子程子曰大學孔氏之遺書而初學入德之門也

子者人之嘉稱聖門諸賢有稱其姓而以子繫之者有稱其字而以子冠之者若顏子曾子冉子及子夏子張子游是也朱子尊敬程子故冠子於程子之上以重致其美也新安陳氏曰倣公羊傳註子沈子之例乃後學宗師先儒之稱說文門從二戶象形玉篇人所出入在堂房曰戶在區域曰門釋名門門也在外爲人所捫摸

於今可見古人爲學次第者獨賴此篇之存而論孟次之學者必由是而學焉則庶乎其不差矣

大學之道在明明德在親民在止於至善

程子曰親當作新

大學者大人之學也

禮學記古之教者家有塾黨有庠術有序國有學比年入學  
中年考校一年視離經辨志三年視敬業樂羣五年視博習  
親師七年視論學取友謂之小成九年知類通達強立而不  
反謂之大成夫然後足以化民易俗近者說服而遠者懷之  
此大學之道也記曰蛾子時衛之其此之謂乎又大學始教  
皮弁祭菜示敬道也宵雅肄三官其始也入學鼓篋孫其業  
也夏楚二物收其威也未卜禘不視學游其志也時觀而弗  
語存其心也幼者聽而弗問學不躡等也此七者教之大倫  
也記曰凡學官先事士先志其此之謂乎又大學之教也時  
教必有正業退息必有居學不學操縱不能安蒞不學博依  
不能安詩不學雜服不能安禮不興其藝不能樂學故君子  
之於學也藏焉修焉息焉游焉又大學之法禁於未發之謂  
豫當其可之謂時不陵節而施之謂孫相  
觀而善之謂摩此四者教之所由興也

明明之也明德者人之所得乎天而虛靈不昧以具衆理而應  
萬事者也但爲氣稟所拘人欲所蔽則有時而昏然其本體之  
明則有未嘗息者故學者當因其所發而遂明之以復其初也  
新者革其舊之謂也言旣自明其明德又當推以及人使之亦

有以去其舊染之汚也

書胤征舊染汚俗咸與維新

止者必至於是而不遷

之意至善則事理當然之極也言明明德新民皆當止於至善之地而不遷蓋必有以盡夫天理之極而無一毫人欲之私也此三者大學之綱領也

說文綱維紘繩也天雅疏網之大繩書盤庚若網在綱有條而不紊釋名領總領衣體爲端首也荀子勤學篇若挈裘領

知止而后有定定而后能靜靜而后能安安而后能慮慮而后能

得

后與後同後倣此

止者所當止之地卽至善之所在也知之則志有定向靜謂心不妄動安謂所處而安慮謂處事精詳得謂得其所止

物有本末事有終始知所先後則近道矣

明德爲本新民爲末知止爲始能得爲終本始所先末終所後

此結上文兩節之意

古之欲明明德於天下者先治其國欲治其國者先齊其家欲齊其家者先脩其身

說文國邦也从口或聲徐曰口其疆境也或亦域字爾雅釋宮牖戶之間曰扂其內謂之家周伯琦曰豕居之圈曰家故从豕从豕後人借爲室家之家猶牢本牛屋後人借爲牢獄之牢釋名身伸也可屈伸也九經韻覽總括百骸曰身

欲脩其身者先正其心欲正其心者先誠其意

釋名心纖也所識纖微無不貫也禮疏總包萬慮謂之心內經心藏神脾藏意靈樞經心有所憶謂之意意之所在謂之志

欲誠其意者先致其知致知在格物

治平聲後倣此

明明德於天下者使天下之人皆有以明其明德也心者身之所主也誠實也意者心之所發也實其心之所發欲其必自慊而無自欺也致推極也知猶識也推極吾之知識欲其所知無

不盡也格至也物猶事也窮至事物之理欲其極處無不到也此八者大學之條目也

漢書劉向傳校中秘書各有條目廣韻條小枝也漢書梅福傳求假輅傳詣行在條對急故註一一條對而言之若木條然禮樂記善問者如攻堅木先其易者後其節目

物格而后知至知至而后意誠意誠而后心正心正而后身脩身脩而后家齊家齊而後國治國治而后天下平

治去聲後倣此

物格者物理之極處無不到也知至者吾心之所知無不盡也知既盡則意可得而實矣意既實則心可得而正矣脩身以上明明德之事也齊家以下新民之事也物格知至則知所止矣意誠以下則皆得所止之序也

自天子以至於庶人壹是皆以脩身為本



百虎通爵篇天子者爵稱也爵所以稱天子何王者父天母地  
爲天之子也援神契天覆地載謂之天子上法斗極鉤命訣帝  
王之德有優劣所以俱稱天子何以其俱命于天而主治於千  
里內也說文庶屋下衆也儀禮士相見庶人則曰刺草之臣孟  
子章指衆庶之人未得爲臣書湯誥格爾衆庶書洪範凡  
厥庶民又兆庶黎庶氓庶見於他記傳皆庶人之謂也

壹是一切也

漢書平帝紀元始元年賜天下民爵一級吏在位二百石以  
上一切滿秩如眞師古註一切者權時之事如以刀切物苟  
取整齊不顧長短  
縱橫故言一切也

正心以上皆所以脩身也齊家以下則舉此而錯之耳

其本亂而末治者否矣其所厚者薄而其所薄者厚未之有也

本謂身也所厚謂家也此兩節結上文兩節之意

右經一章蓋孔子之言而曾子述之

凡二百  
五字

論衡曾子性至孝嘗出薪于野客至家母以手搯臂參卽  
馳至問母曰臂何恙乎母曰今者客至搯臂以呼汝耳家

貧食力敝衣躬耕日不舉火而歌聲若出金石魯君聞而致邑焉固辭不受曰吾聞受人施者常畏人與人者常驕人縱君有賜不吾驕也吾豈能勿畏乎家語曾子嘗芸瓜誤斬其根曾皙怒援杖擊之什地有頃而蘇蹙然而起進曰大人用力教參得毋疾乎退鼓瑟而歌欲父聽其歌而知其平也孔子聞之曰參來勿納也委身待暴怒以陷父於不義安得爲孝乎曾子曰參罪大矣遂造孔子謝過戰國策曾子處費費人有同名參者殺人人告曾子母曰參殺人母曰吾子不殺人織自若有頃人又曰參殺人其母尙織自若頃之又一人告曰參殺人其母懼投杼踰牆而走韓非子曾子往鄭至勝母里旋車而回惡其名也家語齊聘曾子爲卿不就曰吾父母老食人之祿則憂人之事吾不忍遠親而爲人役參後母遇之無恩而供膳不衰其妻蒸梨不熟出之人曰非七出也參曰蒸梨小物耳而不用命况大事乎遂出之其子元請再娶曾子曰高宗以後妻殺孝己尹吉甫以後妻放伯奇吾上不及高宗中不及吉甫庸能免於非乎遂終身不娶禮檀弓曾子寢疾病樂正子坐于牀下曾元曾申坐於足童子隅坐而執燭童子曰華而晄大夫之簀與曾子聞之瞿然曰斯季孫之賜也我未之能易也元起易簀曾元曰夫子之病革矣不可以變幸而至于旦請敬易之曾子曰爾之愛我也不如彼君子之愛人也以德細人之愛人也以姑息吾何求哉吾得

正而斃焉斯已矣舉扶而易之反席未安而沒

### 其傳十章則曾子之意而門人記之也

十一經問答門人所述以其稱曾子曰知之如論語首篇有曾子曰先儒乃以為曾子門人所記朱彝尊經義考漢藝文志曾子十八篇今見于大戴記者十篇篇篇必冠以曾子二字大學不題作者姓氏或云七十子之徒共撰所聞或云是子思作至朱子論定為曾子之書

### 舊本頗有錯簡今因程子所定而更考經文別為序次如左

凡千五百四十六字

四書答問朱子所據者鄭康成元本也康成生於漢末去二戴未遠其本一因戴記之舊康誥曰克明德至止於信鄭本原在沒世不忘之下淇澳烈文二節鄭本原在誠意章後聽訟一章鄭本原在止於信之後正心修身之前此謂知本此謂知之至也二句鄭本原在經文之後而下屬於誠意之前又云大學戴記原文不分經傳只作一篇文字篇首大學之道至未之有也凡二百五字所謂古本大學也朱子因之未嘗有所移易所謂更考經文別為次序

者以傳之錯簡者言也自魏正始中詔諸儒虞松等考正五經刻之於石大學首大學之道一節古之欲明一節次之物有本末一節次之詩云縣蠻一節次之然後次以知止一節又次以詩云邦畿一節子曰聽訟一節然後次以自天子以至庶人二節物格而后一節而戴記元文裂矣後儒不深考知止一節錯亂之由又不察章句聖經一章未嘗更定之實遂以知止而后有定二節為釋格物致知之義自經文中提出定為傳之四章或首知止而后有定二節則近道矣下繼之以子曰聽訟節此謂知本下繼之以此謂知至也一句復綴之曰堯舜之智而不徧物急先務也或作所謂致知在格物者物有本末云云知止而后有定云云子曰聽訟吾猶人也云云此謂知本此謂知至也云云皆自以為得古本大學之意而不自知其割綴經文為程朱之所不敢為也

凡傳文雜引經傳若無統紀然文理接續血脉貫通深淺始終至為精密熟讀詳味久當見之今不盡釋也

## 康誥曰克明德

四書釋地康圻內國名括地志故康城在許州陽翟縣西北三十五里陽翟今禹州正周畿內地按此說本孔安國書傳與作

謚號解者不同存此以備集註所未備 康叔名封武王弟武王誥命為諸侯史臣錄其詞遂以康誥名篇

康誥周書克能也

大甲曰顧諟天之明命

大讀作泰 諟古是字

史記殷本紀大甲成湯適長孫也伊尹立之是為帝大甲元年伊尹作伊訓肆命徂后既立三年不明暴虐不遵湯法亂德於是伊尹放之於桐官攝行政當國以朝諸侯帝大甲居桐宮三年悔過自責反善於是伊尹乃迎而授之政帝大甲修德諸侯咸歸殷百姓以寧伊尹嘉之適作大甲訓三篇褒帝大甲稱大宗大宗崩子沃丁立書序大甲既立不明伊尹放諸桐三年復歸於亳思庸伊尹作大甲三篇

大甲商書顧謂常目在之也諟猶此也或曰審也

廣韻

天之明

命即天之所以與我而我之所以為德者也常目在之則無時

不明矣

帝典曰克明峻德

峻書作俊

說文帝諦也王天下之號也爾雅釋詁君也白虎通德合天者稱帝書序疏帝者天之一名所以名帝帝者諦也言天蕩然無心忘于物我公平通遠舉事審議故謂之帝也史記正義德象天地曰帝

### 帝典堯典虞書峻大也

書集傳堯唐帝名說文曰典從冊在丌上尊閣之也此篇以簡冊載堯之事故名曰堯典後世以其所載之事可為常法故又訓為常也又虞舜氏因以為有天下之號也書凡五篇堯典雖紀唐堯之事然本虞史所作故曰虞書其舜典以下夏史所作當曰夏書春秋傳亦多引為夏書此云虞書或以為孔子所定也書序昔在帝堯聰明文思光宅天下將遜于位讓于虞舜作堯典

### 皆自明也

結所引書皆言自明己德之意

### 右傳之首章釋明明德

此通下三章至止於信舊本誤在沒世不忘之下

湯之盤銘曰苟曰新曰新又曰新

史記殷本紀殷契母曰簡狄有娥氏之女爲帝嚳次妃三人行  
浴見元鳥墮其卵簡狄取吞之因孕生契十二傳至主癸帝王  
世紀主癸之妃曰扶都見白氣貫月意感以乙日生湯故名履  
字天乙書序自契至于成湯八遷湯始居亳從先王居作帝告  
釐沃湯征諸侯葛伯不祀湯始征之作湯征通鑑前編桀三十  
有七歲商湯遣使以幣聘伊尹于有莘新序湯見祝網者置四  
面祝曰從天墜者從地出者從四方來者皆羅吾網湯曰嘻盡  
之矣乃解其三面更教之祝曰欲左者左欲右者右欲高者高  
欲下者下吾取其犯命者漢南之國聞之曰湯之德及禽獸矣  
四十國歸之尙書大傳湯放桀而歸于亳三千諸侯大會湯取  
天子之璽置之天子之坐左復而再拜從諸侯之位曰此天  
子之位有道者可以處之天下非一家之有也湯以此三讓諸  
侯莫敢卽位然後湯卽天子之位天紀國號曰商其圖書曰歸  
藏以冬十二月爲歲首改歲爲祀色尙白行甲寅歷說苑湯時  
大旱七年雒圻川竭煎沙爛石使人持三足鼎祝山川曰政不  
節邪使人疾邪苞苴行邪譏夫昌邪宮室崇邪女謁盛邪何不  
雨之極也言未已而天大雨管子湯以莊山之金鑄幣而贖民  
之無檀賁子者通志命伊尹作樂曰大濩脩九韶六律世紀卽  
位十七年而踐天子位爲天子十三年年百歲  
而崩皇覽湯冢在濟陰亳縣北東郭去縣三里

盤沐浴之盤也銘名其器以自警之辭也

金仁山曰盤沐浴之器也頭曰沐身曰浴禮沐用盤盥漱亦以盤則盤沐器也浴器亦曰盤古有盤孟之戒孟卽杆亦浴器也銘字從名名者書也古者謂字書爲名釋文刻金曰銘古人之有訓誡勲業者多刻之於金器若鐘鼎之類猶後世刻之於碑碣也然則刻字書於金故曰銘古者器必有銘蓋器爲常用之物而銘以自警之辭欲因器之常用而得以常警也張叔與記沐浴之盤本鄭氏註沐謂滌髮浴謂盥手盤卽內則少者奉盤之盤古者浴有二義浴而盥手則與沐同此盤是也浴而澡身則更用杆玉藻所謂浴出杆履蒯席是也履踐也蒯席蒯草之席或問率以潔身言者髮與手亦身也

苟誠也湯以人之洗濯其心以去惡如沐浴其身以去垢故銘其盤言誠能一日有以滌其舊染之污而自新則當因其已新者而日日新之又曰新之不可略有閒斷也

康誥曰作新民



鼓之舞之之謂作

易繫辭鼓之以盡神

言振起其自新之民也

詩曰周雖舊邦其命維新

小序文王文王受命作周也朱子集註周公追述文王之德明周家所以受命而代商者皆由于此以戒成王

詩大雅文王之篇

大雅詳論語

言周國雖舊至於文王能新其德以

及於民而始受天命也

是故君子無所不用其極

自新新民皆欲止於至善也

右傳之二章釋新民

詩云邦畿千里惟民所止

小序元鳥祀高宗也朱子集註此祭祀宗廟之樂詩傳畿疆也詩疏畿者爲之畿限疆唯故爲畿也世紀天子畿方千里孔氏曰唐虞稱服殷周稱畿周禮大司馬方千里曰國畿職方氏方千里曰王畿四書釋地湯都南亳括地志云在宋州穀熟縣西

南三十五里今河南歸德府隋曰宋州穀熟今改柘城至仲丁時亳都河決乃遷於囂在開封府河陰縣舊晉故史記作啟皇甫謐曰或云卽敖倉也括地志云滎陽故城在鄭州滎澤縣西南十七里殷時敖地也未知孰是至河亶甲時又因河害遷於相括地志云在相州內黃縣東南十三里今彰德府後魏曰相州至祖乙時又遷於耿括地志云絳州龍門縣東南十二里有耿城絳州今屬山西省龍門今爲河津縣索隱亦云河東皮氏縣有耿鄉河津卽秦皮氏地尋又遷邢索隱云邢卽是耿今考一統志北直順德府隋曰邢州相傳府城卽祖乙故都而蔡氏書傳亦云或祖乙兩遷也故並存之至盤庚遷於殷在洛州卽今河南府偃師縣西北四十里至武乙又遷河北卽朝歌也在衛州卽今衛輝府東北七十三里一統志云今淇縣卽古朝歌地計南亳在極東耿城在極西相距不止千里然邦畿乃指國言非如今路程之里數也故云千里

### 詩商頌元鳥之篇

朱子曰契爲舜司徒而封於商傳十四世而湯有天下其後三宗迭興及紂無道爲武王所滅封其庶兄微子啟於宋以奉商後修其禮物其後政衰禮樂日以放夫七世至戴公時大夫正考父得商頌十二篇於周太師歸以祀其先王至孔子編詩而又亡其七篇鄭康成曰商在太華之陽皇甫謐曰今上洛商是也括地志云商州東八十里商洛縣本古商國

契所封也元鳥一名鳳即燕也其名自呼作巢避戊己月  
令仲春之月元鳥至至之日以太牢祀於高禩仲秋之月元

鳥歸

邦畿王者之都也止居也言物各有所當止之處也

### 詩云緡蠻黃鳥止于丘隅

小序緡蠻微臣刺亂也大臣不用仁心遺忘微賤不肯飲食教誨之故作是詩也朱子集註此微賤勞苦而思有所託者為鳥言以自比也卑雅黃鳥黃栗留也一名倉庚一名商庚一名鷦黃一名鷦鷯一名鷦鷯或謂之楚雀或謂之黃袍或謂之博黍或謂之黃鳥皆此物也當樵熟時來在桑樹鳴則蠶熟亦應節趣時之鳥也廣雅小陵曰丘風俗通丘字二人立一上者地也四方高中央下象形也爾雅釋丘非人為之丘李巡註謂非人力所為自然生為丘也箋丘隅丘角也

### 子曰於止知其所止可以人而不如鳥乎

緡詩作緡

詩小雅緡蠻之篇

小雅詳論語

緡蠻鳥聲丘隅岑蔚之處

岑小山而高也張衡南都賦幽谷蔚岑蔚是草木盛貌詩曹風蕭兮蔚兮學庸集說啓蒙岑是山尖銳處蔚是林蒼茂處

山尖銳則網羅弓矢不可到林蓊茂則鷹隼不可及四書釋地說文解丘爲土之高岑爲山小而高高同也而土與山不同况蔚乃草木盛貌與隅益無交涉鄭康成大學註就而觀之知鳥擇岑蔚安閒而止處之耳語原寬緩不切切貼丘隅孔穎達疏方云鳥止在於岑蔚丘隅之處又云鳥之知在岑蔚安閒之處朱子遂認作正解入集註似誤

子曰以下孔子說詩之辭言人當知所當止之處也

## 詩云穆穆文王於緝熙敬止

按史記禮記通鑑帝王世紀呂氏春秋等書文王名昌季歷之子也季歷妃太任端一誠莊維德之行及有娠目不視惡色耳不聽淫聲口不出傲言能以胎教遂以商祖甲二十八祀庚寅生子昌龍顏虎眉日角鳥鼻身長十尺臂有四乳聖智慈理其爲世子也朝于王季日三鵲初鳴而衣服至于寢門外問內豎之御者曰今日安否何如內豎曰安文王乃喜及日中又至亦如之及暮又至亦如之其有不安節則內豎以告文王文王色憂行不能正履王季復膳然後亦復初食上必在視寒煖之節食下問所膳命膳宰曰末有原應曰諾然後退帝乙七祀丙子季歷卒嗣爲侯伯篤仁敬老慈幼禮賢晏朝不食以延四方之士詢于八虞諮于二虢度于閼天諏于蔡原訪于辛尹重之以周召畢榮億寧百神而柔和萬民於是伯夷鬻熊之徒咸至紂

以西伯昌與九侯鄂侯爲三公九侯有女進之紂女不喜淫紂殺之而醢九侯鄂侯強爭力辯并脯鄂侯西伯聞之竊嘆崇侯虎知之私以告紂紂乃囚西伯于羑里將殺之西伯曰吾唯明天人之道以順受之耳因取庖犧氏之八卦重爲六十四卦次序而演之作卦下之辭垂世立教而筮吉占焉又嘗作琴操以寫懷會閔天之徒求有莘氏美女驪戎之文馬有熊之九駒及他奇怪物因嬖臣費仲獻之紂紂大悅指有莘女曰此一物足以釋西伯况其多乎乃赦西伯賜之弓矢斧鉞得專征伐曰譜西伯者崇侯虎也滅之紂臣祖伊聞之奔告于紂紂曰我生不有命蒼即黎國也滅之紂臣祖伊聞之奔告于紂紂曰我生不有命在天乎祖伊反曰紂不可諫矣又明年問崇亂而伐之三旬而不降退修教而復伐之因壘而降宅程三年遭天之大荒作大匡以詔牧其方三州之侯咸率王乃召冢卿三老三吏大夫百執事朝于大庭因作豐邑徙都之王侵孟克苴舉鄴三舉事而紂惡之乃請入洛西之地赤壤之國方千里以請解炮烙之刑天下皆說嘗立靈臺掘地得死人骨西伯曰更葬之吏曰此無主矣西伯曰有天下者天下之主也有一國者一國之主也寡人固其主又安所求主乎遂葬之天下皆曰澤及枯骨况其人乎於是歸者三十國三分天下奄有其二虞芮二國之君相與爭田久而不平乃相與朝周入其境則耕者讓畔行者讓路入其邑男女異路斑白者不提挈入其朝士讓爲大夫大夫讓爲卿二國之君感而相謂曰我等小人不可以履君子之境乃相

讓以其所爭田爲閒田而退天下聞而歸者四十餘國嘗出獵得太公望載與俱歸立爲師謂之師尚父西伯壽至九十七而終

爲人君止於仁爲人臣止於敬爲人子止於孝爲人父止於慈與

國人交止於信

於緝之於音烏

詩文王之篇穆穆深遠之意於歎美辭緝繼續也熙光明也敬止言其無不敬而安所止也引此而言聖人之止無非至善五者乃其目之大者也學者於此究其精微之蘊而又推類以盡其餘則於天下之事皆有以知其所止而無疑矣

詩云瞻彼淇澳棗竹猗猗有斐君子如切如磋如琢如磨瑟兮僖兮赫兮喧兮有斐君子終不可諠兮

小序淇與美武公之德也有文章又能聽規諫以禮自防故能入相于周美而作是詩也朱子集註衛人美武公之德而以綠

服飾之尊嚴以竹之至盛興其德之成就也說文水出河內共  
北山東入河或曰出隆慮西山一統志表今彰德府林縣明一  
統志淇水在今衛輝府淇縣爾雅葦王芻郭璞註葦葦也今呼  
芻脚莎鄭註葦草亦名葦葦本草唐慎微曰葦草葉如竹細薄  
葉員小生平澤溪澗側可以染黃洗瘡俗名葦葦草通雅似竹  
之小草有十一種曰綠卽說文之葦漢書葦綬晉灼注曰葦草  
出瑯琊似艾可染是也北人呼綠爲葦古者貢草入染人故謂  
之王芻一種曰綠竹草詩注作王芻篇竹二草陸璣以綠竹爲  
一草名埤雅竹物之有筋節者也東南之美者有會稽竹箭焉  
今竹性亦喜東南引生漢書武帝塞瓠子決河薪柴少乃下淇  
園之竹以爲榱寇恂傳伐淇園之竹爲矢百餘萬述異記衛有  
園出竹在淇水上竹譜淇園殷紂竹箭園也國語左史倚相曰  
衛武公年數九十有五矣猶箴儆於國曰自卿以下至於師長  
士苟在朝者無謂吾老耄而舍我必恪恭於朝朝夕以交戒我  
聞一二之言必誦志而納之以訓道我在與有旌賞之覲位寧  
有官師之典倚几有誦訓之諫居寢有替御之箴臨事有替史  
之道宴居有師工之誦史不失諫以訓御之於於是乎  
作懿戒以自儆也及其沒也謂之康聖武公史記衛世家衛武  
公名和釐侯之子武公卽位修康叔之政百姓和集四十二年  
大戎滅周幽王武公將兵往佐周平戎甚有功五十五年卒爾  
雅釋義金謂之錢木謂之刻昔謂之以象謂之磁玉謂之琢石

謂之

如切如磋者道學也如琢如磨者自脩也瑟兮僖兮者恂慄也赫

能忘也

澳於六反萊詩作綠猗叶韻音阿僖下版反喧詩作喧誼詩作誼並况晚反恂鄭氏讀作峻

晃公武曰文字之學有三形義聲也論形者說文玉篇是也論

義者爾雅方言是也論聲者沈約四聲譜及西域翻切之學是

也以聲言之如鄭康成註經止曰讀如某字第為譬况之詞至

魏孫炎始為反語見陸德明尚書釋文序錄有謂反切始自周

彥倫者非也自西域字母之說入中國乃有翻切之法隋書經

籍志所云能以十四字貫一切音文省而義廣謂之婆羅門書

是也按求字有反切二義反者翻也謂以聲韻輾轉相叶而成

聲切者磋也謂以兩字磨盪而成聲名雖有二義本不殊故集

註音釋專以反言之後漢書列傳鄭元字康成北海高密人少

為鄉嗇夫嘗詣學官不樂為吏父數怒之不能禁遂造太學受

業師事京兆第五元先始通京氏易公羊春秋三統歷九章算

術又從東郡張恭祖受周官禮記左氏春秋韓詩古文尚書以

山東無足問者乃西入關事扶風馬融質諸疑義問畢辭歸融



遂隱修經業杜門不出靈帝末大將軍何進聞而辟之設几杖禮待甚優元不受朝服而以幅巾見一宿逃去後將軍袁隗表為侍中以父喪不行國相孔融深敬於元屣履造門告高密縣為元特立一鄉曰鄭公鄉廣開門衢令容高車號通德門建安初公車徵為大司農給安車一乘所過長吏送迎元乃以病自乞還家卒年七十四門生相與撰元荅諸弟子問五經依論語作鄭志八篇所註周易尚書毛詩儀禮禮記論語孝經尚書大傳中候乾象歷又著天文七政論魯禮禘祫義六藝論毛詩譜駁許慎五經異議荅臨孝存周禮難凡百餘萬言元質于辭訓通人頗議其繁至于經傳洽熟稱為純儒齊魯開宗之

### 詩衛風淇澳之篇

朱子詩經集傳衛在禹貢冀州商紂都焉武王克商分自紂城朝歌而北謂之邯鄲謂之鄘東謂之衛武王封其弟康叔於衛其後并得邯鄲之地今懷衛澶相滑濮等州開封大名府界皆衛境也邯鄲地既入衛其詩皆為衛事

### 淇水名澳隈也

爾雅釋丘隈隈註今江東呼為浦隈淮南子曰漁者不爭隈疏孫炎曰隈水曲中也案淮南子原道篇昔舜釣於河濱期年而漁者爭處滿瀨以曲隈深潭相予是不爭隈之事引之以證隈即厓內深隈之處也又厓內為隈外為隈疏李巡曰

厓內近水爲隈外爲鞠詩大雅公劉云芮鞠之即毛傳云水之外曰鞠然則厓在水曲其內名隈又名隈其外名鞠今云外爲隈者隈當作鞠傳寫誤也按此則集註以隈釋澳乃本爾雅疏李巡說也

猗猗美盛貌興也斐文貌切以刀鋸琢以椎鑿皆裁物使成形質也

釋名刀到也以斬伐到其所也鋸倨也其體直所截應倨句之平也椎推也鑿有所穿鑿也古史考孟莊子作鋸作鑿正字通鋸鐵葉爲之齟齬其齒一左一右以片解木石也說文椎鐵椎也廣韻鑿鑿也顏師古曰所以穿木也莊子桓公讀書於堂上輪扁斲輪於堂下釋椎鑿而上曰敢問君之所讀爲何言耶

磋以鋸錫磨以沙石皆治物使其滑澤也

說文錯錯銅鐵韻會錫以鐵爲斷凡木石有斧斤痕迹者摩之令平也後漢書董卓傳註卓鑄小錢大五分無輪廓不磨鑄說文沙水散石也从水从少水少沙見山海經盧其之山無草木多沙石書禹貢荊州璊瑳砮丹玉簋崦嵫之山多璊砥可磨刃

治骨角者既切而復磋之治玉石者既琢而復磨之皆言其治之有緒而益致其精也

左傳骨角毛羽不登於器則公不射按考工記有治玉石之工則四者皆工人所治以成器者也

瑟嚴密之貌圓武毅之貌赫喧宣著盛大之貌誼忘也道言也

學謂講習

易兌卦象君子以朋友講習

討論論語世叔之事自脩者省察克

治之功恂慄戰懼也威可畏也儀可象也

左傳襄公三十一年衛北宮文子曰有威而可畏謂之威有儀而可象謂之儀君有君之威儀其臣畏而愛之則而象之故能有其國家令聞長世臣有臣之威儀其下畏而愛之故能守其官職保族宜家

引詩而釋之以明明明德者之止於至善道學自脩言其所以

得之之由恂慄威儀言其德容表裏之盛

毛子孔德之容惟道是從註孔盛也史記

老子傳良賈深藏若虛君子盛德容貌若愚

卒乃指其實而歎美之也

詩云於戲前王不忘

〔小序〕成王卽政諸侯助祭也朱子集註此祭于祖廟而獻助祭諸侯之樂歌

君子賢其賢而親其親小人樂其樂而利其利此以沒世不忘也

於戲音鳴呼樂音洛

詩周頌烈文之篇

鄭氏康成曰周頌者周室成功致太平德洽之詩其作在周公攝政成王卽位之初餘詳論語

於戲歎辭前王謂文武也君子謂其後賢後王小人謂後民也此言前王所以新民者止於至善能使天下後世無一物不得其所所以旣沒世而人思慕之愈久而不忘也此兩節咏歎淫

洸

〔禮樂記〕咏歎之淫洸洸之

其味深長當熟玩之

右傳之三章釋止於至善

此章內自引淇澳詩以下舊本誤在誠意章下

子曰聽訟吾猶人也必也使無訟乎無情者不得盡其辭大畏民志此謂知本

周禮秋官大司寇之職以兩造禁民訟入束矢於朝然後聽之以兩劑禁民獄入鈞金三日乃致於朝然後聽之以嘉石平罷民凡萬民之有罪過而未麗于法而害於州里者極桎而坐諸嘉石役諸司空以肺石達窮民凡遠近惇獨老幼之欲有復於上而其長弗達者立於肺石三日士聽其詞以告于王而罪其長小司寇之職以五聲聽獄訟求民情一曰詞聽二曰色聽三曰氣聽四曰耳聽五曰目聽

猶人不異於人也情實也引夫子之言而言聖人能使無實之人不敢盡其虛誕之辭蓋我之明德既明自然有以畏服民之心志故訟不待聽而自無也觀於此言可以知本末之先後矣  
右傳之四章釋本末

此章舊本誤在止於信下

此謂知本

程子曰衍文也

此謂知之至也

此句之上別有關文此特其結語耳

右傳之五章蓋釋格物致知之義而今亡矣

此章舊本通下章誤在經文之下

閒嘗竊取程子之意以補之曰所謂致知在格物者言欲致吾之知在即物而窮其理也蓋人心之靈莫不有知而天下之物莫不有理惟於理有未窮故其知有不盡也是以大學始教必使學者即凡天下之物莫不因其已知之理而益窮

之以求至乎其極至於用力之久而一旦豁然

使記高帝紀意豁然也

豁然開大之貌

貫通焉則衆物之表裏精粗無不到而吾心之全體

大用無不明矣此謂物格此謂知之至也

所謂誠其意者毋自欺也如惡惡臭如好好色此之謂自謙故君

子必慎其獨也

惡好上字哲去聲謙讀爲慊苦劫反

誠其意者自脩之首也毋者禁止之辭自欺云者知爲善以去

惡而心之所發有未實也謙快也足也獨者人所不知而已所

獨知之地也言欲自脩者知爲善以去其惡則當實用其力而

禁止其自欺使其惡惡則如惡惡臭好善則如好好色皆務決

去而求必得之以自快足於已不可徒苟且以徇外而爲人也

然其實與不實蓋有他人所不及知而已獨知之者故必謹之

於此以審其幾焉

小人閒居爲不善無所不至見君子而后厭然揜其不善而著其善人之視己如見其肺肝然則何益矣此謂誠於中形於外故君

子必慎其獨也

閒音閑厭鄭氏讀爲厭

白虎通情性篇肝之爲言干也肺之爲言費也五臟肝仁肺義肝木之精也仁者好生萬物生於東方也肺金之精也義者斷決西方金成萬物也按通鑑宋孝宗名昀昀即古慎字朱子敬避君諱故於此篇及中庸天命章註慎皆作謹

閒居獨處也厭然消沮閉藏之貌此言小人陰爲不善而陽欲揜之則是非不知善之當爲與惡之當去也但不能實用其力以至此耳然欲揜其惡而卒不可揜欲詐爲善而卒不可詐則亦何益之有哉此君子所以重以爲戒而必謹其獨也

曾子曰十目所視十手所指其嚴乎



釋名目默也默而內識也眼限也瞳子限限而出也春秋元命苞目肝之使神回元目神名虛監生字道童形長三寸六分衣五色又云兩目神亦人日月精也左曰字英明右曰字元光釋名手須也事業之所須也

引此以明上文之意言雖幽獨之中而其善惡之不可揜如此可畏之甚也

富潤屋德潤身心廣體胖故君子必誠其意

胖步丹反

說文屋從尸人所主者曰尸從至至所止也釋名屋奧也其中溫奧也大屋曰廡廡懔懔也懔覆也并冀人謂之房房正也屋之正大者也論衡屋覆人形宅居人體釋名體第也骨肉毛血表裏大小相次第也形有形象之異也軀區也是衆名之大總若區域也

胖安舒也言富則能潤屋矣德則能潤身矣故心無愧怍則廣大寬平而體常舒泰德之潤身者然也蓋善之實於中而形於外者如此故又言此以結之

右傳之六章釋誠意

經曰欲誠其意先致其知又曰知至而后意誠蓋心體之明有所未盡則其所發必有不能實用其力而苟焉以自欺者然或已明而不謹乎此則其所明又非己有而無以爲進德之基故此章之指必承上章而通考之然後有以見其用力之始終其序不可亂而功不可闕如此云

所謂脩身在正其心者身有所忿懣則不得其正有所恐懼則不得其正有所好樂則不得其正有所憂患則不得其正

程子曰身作心忿弗粉反懣教值反好樂並去聲

忿懣怒也

雙峯饒氏曰忿者怒之甚懣者怒之謂

蓋是四者皆心之用而人所不

能無者然一有之而不能察則欲動情勝而其用之所行或不

能不失其正矣

心不在焉視而不見聽而不聞食而不知其味

書洪範潤下作鹹炎上作苦曲直作酸從革作辛稼穡作甘禮月令春其味酸夏其味苦中央土其味甘秋其味辛冬其味鹹內則凡和春多酸夏多苦秋多辛冬多鹹調以滑甘左傳耶六年天有六氣降生五味

心有不存則無以檢其身

書伊訓檢身若不及

是以君子必察乎此而敬

以直之

易坤卦君子敬以直內義以方外

然後此心常存而身無不脩也

此謂脩身在正其心

右傳之七章釋正心脩身

此亦承上章以起下章蓋意誠則真無惡而實有善矣所以能存是心以檢其身然或但知誠意而不能密察此心之存否則又無以直內而脩身也自此以下並以舊文爲正

所謂齊其家在脩其身者人之其所親愛而辟焉之其所賤惡而辟焉之其所畏敬而辟焉之其所哀矜而辟焉之其所敖惰而辟焉故好而知其惡惡而知其美者天下鮮矣辟讀為僻惡而之惡教好並去聲鮮上聲

爾炳文大學通心與物接惟怒最易發而難制前章故以忿懣先之身與事接惟愛最易偏此章故以親愛先之

人謂眾人之猶於也辟猶偏也五者在人本有當然之則然常人之情惟其所向而不加察焉則必陷於一偏而身不脩矣

故諺有之曰人莫知其子之惡莫知其苗之碩

諺音彥碩叶韻時若反

廣韻諺俗言也書無逸乃逸乃諺傳俚語曰諺說文苗草生於

田者穀曰苗凡草初生亦曰苗呂氏春秋苗者禾也生曰苗秀曰禾其弱也欲孤長也欲相與居其熟也欲相扶是故三以爲族乃多粟詩小雅播厥百穀既庭且碩鄭箋碩大也

諺俗語也溺愛者不明貪得者無厭是則偏之爲害而家之所

以不齊也

此謂身不脩不可以齊其家

右傳之八章釋脩身齊家

所謂治國必先齊其家者其家不可教而能教人者無之故君子不出家而成教於國孝者所以事君也弟者所以事長也慈者所以使衆也

弟去聲  
長上聲

身脩則家可教矣孝弟慈所以脩身而教於家者也然而國之所以事君事長使衆之道不外乎此此所以家齊於上而教成於下也

康誥曰如保赤子心誠求之雖不中不遠矣未有學養子而后嫁者也

中去聲

禮內則女子十有五年而笄二十而嫁有故二十三年而嫁自虎通嫁娶篇人道所以有嫁娶何以爲性情之大莫若男女男

女之交莫若夫婦故設嫁娶之禮者重人倫廣繼嗣也禮男娶女嫁何陰卑不得自專就陽而成之故傳曰陽倡陰和男行女隨男三十而娶女二十而嫁陽數奇陰數偶男長女幼者陽促陰舒男三十筋骨強壯任爲人父女二十肌膚充盈任爲人母合爲五十應大衍之數生萬物也嫁者家也婦人外成以出適人爲嫁娶者取也

此引書而釋之又明立教之本不假強爲在識其端而推廣之耳

一家仁一國興仁一家讓一國興讓一人貪戾一國作亂其機如此

說文主發謂之機

此謂一言僨事一人定國僨音奮

一人謂君也機發動所由也僨覆敗也此言教成於國之效

堯舜帥天下以仁而民從之

大戴禮帝嚳產放勳是爲帝堯帝王世紀帝堯陶唐氏祁姓母慶都孕十四月而生堯於丹陵或從母姓伊氏年十五佐帝摯受封于唐二十而登帝位都平陽家語堯以火德王色尚黃論衡堯候四時之中命羲和察四星以占時氣呂氏春秋堯戰于丹水之浦以服南蠻命質爲樂名之曰大章以祭上帝淮南子堯使羿誅鑿齒于疇華之野殺九嬰于凶水之上繳大風于青丘之澤上射十日而下殺猰貐斷脩蛇于洞庭擒封稀于桑林萬民皆喜列子堯微服遊于康衢聞童兒謠曰立我烝民莫匪爾極不識不知順帝之則高士傳帝堯之世壤父年八十餘而擊壤于道中曰日出而作日入而息鑿井而飲耕田而食帝何德于我哉莊子堯觀乎華華封人曰請祝聖人壽富多男子堯曰多男子則多懼富則多事壽則多辱三者非所以養德也故辭封人曰天生萬民必授之職多男子而授之職何懼之有富而使人分之何事之有天下有道與物皆昌天下無道脩德就開千歲厭世去而上僊何辱之有史記其仁如天其知如神就之如日望之如雲富而不驕貴而不舒黃收純衣彤車乘白馬說苑當堯之時舜爲司徒契爲司馬禹爲司空后稷爲田疇夔爲樂正倕爲工師伯夷爲秩宗皋陶爲大理益掌醵禽堯知九職之事使九子者各封其事皆勝其任以成九功堯遂成厥功以王天下新書帝堯曰吾存心于先古加意于窮民痛萬姓之罹罪憂衆生之不遂也故一民或饑曰我饑之一民或寒曰我寒之一民有罪曰我陷之尚書中候堯卽政七十載德政清平

此隆伏羲鳳皇巢于阿閣驩林景星出翼軫朱草生階嘉禾滋  
連甘露潤液醴泉出山說文蓬蒲瑞草也堯時生于庖廚扇暑  
而涼田佚子冀英生于庭爲帝成歷博物志有屈軼草生于庭  
佞人入朝則屈而指之一名指佞草帝王世紀堯娶散宜氏之  
女曰女皇生丹朱又有庶子九人皆不肖又堯以甲申歲生甲  
辰卽帝位甲午徵舜甲寅舜代行天子事辛巳崩年百十八在  
位九十八年葬于濟陰之城陽西北是爲穀林帝王世紀帝舜  
有虞氏姚姓也目重瞳故名重華字都君有聖德宋書符瑞志  
母曰握登見大虹意感而生舜于姚墟史記舜父瞽叟盲而舜  
母死瞽叟更娶妻而生象象傲瞽叟愛後妻子常欲殺舜舜順  
適不失子道兄弟孝慈欲殺不可得卽求嘗在側年二十以孝  
聞尸子虞舜灰于常羊什器于壽丘就時負夏未嘗暫息頓丘  
賈貴于是販于頓丘傳虛賣賤于是債于傳虛以均救之又其  
游也得六人曰雄陶方回續牙伯陽東不訾泰不空皆一國之  
賢者韓非子歷山之農者侵畔舜往耕焉耆年畊畝正河濱之  
漁者爭坻舜往漁焉耆年而讓長東夷之陶者器苦窳舜往陶  
焉耆年而器牢淮南子堯妻以二女以觀其內任以百官以觀  
其外乃屬以九子贈以昭華之玉論衡試之於職官治職脩事  
無廢亂使入大麓之野虎狼不搏螻蛇不噬逢烈風疾雨行不  
迷惑文中子舜一歲而巡四岳兵衛少而徵求寡也家語舜之  
爲君其政好生而惡殺其任授賢而替不肖德若天地而靜虛  
化若四時而變物是以四海承風暢于異類鳳翔麟至鳥獸馴



德無他好生故也。又舜彈五絃之琴，造南風之詩，曰：「南風之薰兮，可以解吾民之愠兮。」南風之時兮，可以阜吾民之財兮。」尚書大傳：「于時俊乂百工相和而歌，卿雲帝乃倡之，曰：『卿雲爛兮，糺糺然星陳。』」日月光華，旦復旦兮。八伯咸進，稽首而和，曰：「明明上天，行四時，從經萬姓，允誠於予，論樂配天之靈，還于賢聖，莫不咸聽。」龔乎鼓之，軒乎舞之，菁華已竭，褰裳去之。于時八風脩通，卿雲蓂聚，蟠龍賁信于其藏，蛟魚踴躍于其淵，龜鼈咸出于其穴。天戴禮：「舜娶于帝堯之子，謂之女嬭氏。」列女傳：「有虞二妃，堯二女也。長娥皇，次女英。帝王世紀：娥皇無子，女英生商均。」史記：「舜年二十，以孝聞。年三十，堯舉之年，五十攝行天子事。年五十八，堯崩，年六十一，一代堯踐帝位，踐位三十九年。南巡狩崩于蒼梧之野，葬于江南，九疑是為零陵。」按書：堯典云：「克明俊德，以親九族。」九族既睦，平章百姓。百姓昭明，協和萬邦。黎民於變時雍。此堯民之從仁也。大禹謨云：「帝德罔愆，臨下以簡，御眾以寬，罰弗及嗣，賞延于世，宥過無大，刑故無小，罪疑惟輕，功疑惟重，與其殺不辜，寧失不經，好生之德，洽于民。」心茲用不犯于有司，此舜民之從仁也。

# 桀紂帥天下以暴而民從之

史記：夏本紀：「帝履癸立，是為桀。自孔甲以來，諸侯多畔。夏桀不務德而武傷百姓，百姓弗堪。」國語：「桀伐有施，有施人以妹喜女。」

焉帝王世紀妹喜好聞裂縉之聲爲發縉裂之以順適其意以人駕車肉山脯林以酒爲池一鼓而牛飲者三千人醉而溺水又桀淫虐有才力手能搏虎通志桀欲肆其侈心爲有仍之食有緡氏見王汰侈不善也引師先歸桀怒帥諸侯攻克之愈自矜肆諸侯韋氏顧氏昆吾氏黨桀之惡恣行亂政以虐其民太公金匱桀怒湯以諛臣趙梁訃召而囚之均臺寘之種泉嫌于死湯行賂桀釋之而賞之贊茅淮南子夏之將云太史公終古先奔于商大紀桀窮其宗族恥其動舊輕其賢良棄義聽讒諸侯危其位大夫隱其道舉事戾于天發令逆其時關龍逢諫曰人君謙恭敬信節用愛人故天下安而社稷宗廟固今王侈靡嗜殺民惟恐君之後亡矣人心已去天命不祐盍少悛乎不聽龍逢立而不去桀怒遂殺之竹書紀年十年五星錯行夜中星隕如雨地震伊洛竭二十九年三日並出冬十月鑿山穿陵以通于河三十年瞿山崩帝王世紀湯來伐桀以乙卯旦戰于鳴條之野桀未戰而敗績乃與妹喜及諸嬖妾同舟浮海奔于南巢之山而死史記殷本紀帝乙長子微子啟母賤不得嗣少子辛立天下謂之紂資辨捷疾聞見甚敏材力過人手格猛獸知足以距諫言足以飾非矜人臣以能高天下以聲以爲皆出己之下好酒淫樂嬖于婦人竹書紀年王師伐有蘇獲妲己以歸帝王世紀紂造傾宮作瓊室飾以美玉七年乃成其大十里其高千丈多發美女以充傾宮之室婦人衣綰統者三百人論衡紂沉湎于酒以糟爲丘以酒爲池長夜之飲忘其甲子車行酒

騎行炙百二十日爲一夜列女傳爲炮烙之法膏銅柱加之炭  
令有罪者行其上輒墮炭中妲己乃笑淮南子文王砥德脩政  
三年而天下二分歸之紂聞而患之乃拘文王于羑里散宜生  
以千金求天下之珍怪因費仲而通紂見而說之乃免其身大  
紀紂始爲象箸箕子歎曰今爲象箸必爲玉杯玉杯象箸必將  
食熊羆豹胎他又將稱是王求足欲天下殆哉又先是毫有雀  
生鷁史占之曰以小生大威振名昌紂愈輕肆棄舊貴戚大  
臣商容微子微仲箕子比干膠鬲之徒不用而用蜚廉惡來蜚  
廉者孟戲仲衍之裔孫惡來其子也俱以材力進善諛好佞賢  
臣梅伯性忠直數諫諍紂怒殺而醢之有雷開者阿佞進諛言  
紂賜金玉而封之賞以夏田或諫曰非時也君踐一日之苗而  
民失終歲之食其可乎殺之夷羊在牧蜚鴈滿野山鳴河竭天  
雨肉雨石兩日見龜生毛兔有角女子化爲丈夫宮中夜聞哭  
聲而不見其人黎侯近于王畿不恭王命紂方日夜極意聲色  
不知治也西伯發戡黎殷人大震史記武王率諸侯伐紂紂發  
兵距之牧野甲子日紂兵敗紂走入登鹿臺衣其寶玉衣赴火  
而死按書仲虺之誥云簡賢附勢實繁有徒多方云厥圖帝  
之命不克開于民之麗乃大降罰崇亂有夏因甲于內亂不克  
靈承于旅罔丕惟進之恭洪舒于民亦惟有夏之民叨憤日欽  
劓割夏邑此桀民之從暴也微子云殷罔不小大好草竊姦究  
卿士師師非度凡有辜罪乃罔恒獲小  
民方興相爲讎敵此紂民之從暴也

其所令反其所好而民不從是故君子有諸己而后求諸人無諸己而后非諸人所藏乎身不恕而能喻諸人者未之有也聲好去  
此又承上文一人定國而言有善於己然後可以責人之善無惡於己然後可以正人之惡皆推己以及人所謂恕也不如是則所令反其所好而民不從矣喻曉也

### 故治國在齊其家

通結上文

### 詩云桃之夭夭其葉蓁蓁之子于歸宜其家人

小序桃夭后妃所致也不妬忌則男女以正婚姻以時國無繆民也朱子集註文王之化自家而國男女以正婚姻以時故詩人因所見以起興而歎其女子之賢知必有以宜其室家也埤雅桃有華之盛者其性早華又華于仲春桃生三歲即華果典術桃者五木之精也故厭伏邪氣制百鬼今人作桃符以厭邪述異記桃之大者為木桃詩云投我以木桃是也

言  
宜其家人而后可以教國人

天平聲  
慕音臻

詩周南桃天之篇

周南見論語

天天少好貌慕慕美盛貌興也之子

猶言是子此指女子之嫁者而言也婦人謂嫁曰歸宜猶善也

公羊傳隱公二年女曷為或稱女或稱婦或稱夫人女在其國稱女在塗稱婦入國稱夫人伯姬者何內女也其言歸何

婦人謂嫁曰歸

詩云宜兄宜弟

小序  
蕭蕭澤及四海也朱子集註諸侯朝于天子天子與之燕以示慈惠故歌此詩

宜兄宜弟而后可以教國人

詩小雅蓼蕭篇

朱子集註  
蓼長大貌蕭蒿也嚴氏榮曰蒿總名蕭蒿之香者也詩名物疏似白蒿白葉莖蘆科生多者數十莖可作燭有

香氣故祭祀以脂熬之為香

詩云其儀不忒正是四國

不忒鳴鳩刺不壹也在位無君子用心之不壹也朱子集註詩人美君子之用心均平專一也

其爲父子兄弟足法而后民法之也

詩曹風鳴鳩篇忒差也

朱子集註曹國名其地在禹貢兖州陶丘之北雷夏河澤之野周武王以封其弟振鐸今之曹州卽其地也按曹州卽今曹縣屬山東省曹州府鄭氏康成曰曹風民厚重務稼穡薄衣食以致畜積夾於魯衛之間又寡於患難末時富而無教乃更驕侈十一世當周惠王時政衰昭公好奢而任小人曹之變風始作陳氏傅良曰夫子刪詩繫曹檜於國風之後於檜之卒篇曰思周之道也傷天下之無王也於曹之卒篇曰思治也傷天下之無伯也爾雅鳴鳩鵲鵲註布穀也江東呼獲穀疏一名擊穀一名桑鳩朱子曰餽子朝從上下暮從下上

此謂治國在齊其家

此三引詩皆以咏歎上文之事而又結之如此其味深長最宜

潛玩

右傳之九章釋齊家治國

所謂平天下在治其國者上老老而民興孝上長長而民興弟上

恤孤而民不倍是以君子有絜矩之道也

長上聲弟去聲倍與背同絜胡結反

漢書律歷志權與物鈞而生衡衡運生規規圓生矩矩方生繩繩直生準準正則平衡而鈞權矣是謂五則規者所以規圓器械令得其類也矩者所以矩方器械令不失其形也規矩相須陰陽位序圖方乃成準者所以揆平取正也繩者上下端直經緯四通也準繩連體權衡合德百工由焉以定法式冬權夏衡秋矩春規中央為繩厥法有品各順其方而應其行職在大行鴻臚掌之

老老所謂老吾老也與謂有所感發而興起也孤者幼而無父

之稱絜度也矩所以為方也言此三者上行下效捷於影響

書大

禹謨惠迪吉從逆凶惟影響

所謂家齊而國治也亦可以見人心之所同而

不可使有一夫之不獲矣書說命一夫不獲則曰時予之辜是以君子必當因

其所同推以度物使彼我之間各得分願則上下四旁均齊方

正而天下平矣

所惡於上母以使下所惡於下母以事上所惡於前母以先後所  
惡於後母以從前所惡於右母以交於左所惡於左母以交於右

此之謂絜矩之道惡先並去聲

此覆解上文絜矩二字之義如不欲上之無禮於我則必以此  
度下之心而亦不敢以此無禮使之不欲下之不忠於我則必  
以此度上之心而亦不敢以此不忠事之至於前後左右無不  
皆然則身之所處上下四旁長短廣狹彼此如一而無不方矣  
彼同有是心而興起焉者又豈有一夫之不獲哉所操者約而



所及者廣此平天下之要道也故章內之意皆自此而推之

詩云樂只君子民之父母

〔小序〕南山有臺樂得賢也得賢則能為邦家立太平之基矣〔朱子集註〕此燕享通用之樂

民之所好好之民之所惡惡之此之謂民之父母

樂音洛只音紙好惡並去聲下

並同

詩小雅南山有臺之篇

四書釋地詩詠南山不必盡有指實而可指實者二焉一曹南之山〔郡縣志〕在曹州濟陰縣東二十里南山朝陽是也今曹縣一終南之山〔郡縣志〕在京兆府萬年縣南五十里節彼南山是也今長安咸寧藍田藍屋四縣按南山有臺之南山當卽是節南山之山也〔陸機詩疏〕臺夫須莎草也可為蓺芷

只語助辭言能絜矩而以民心為己心則是愛民如子而民愛之如父母矣

詩云節彼南山維石巖巖赫赫師尹民具爾瞻

小序節南山家父刺幽王也朱子集註此詩家父所作刺王用尹氏以致亂釋名山體曰石石磬磬也堅捍磬也山多大石曰磬磬學也大石之形學學然山多小石曰磬磬堯也每石堯堯獨處而出見也又云地以石為骨春秋說題辭周易艮為山為小石石陰中之陽陽中之陰陰精輔陽故山含石石之為言託也託立法也物理論土精為石石氣之核也氣之生石猶人筋絡之生爪牙也說文磬小石也磊眾石也磬文石也琅玕石似珠也砥砭石似玉也書周官立太師太傅太保茲惟三公論道經邦變理陰陽官不必備惟其人詩經集傳尹吉甫之後春秋書尹氏卒公羊子以為讓世卿者是也按左傳隱五年王使尹氏助曲沃伐晉僖二十八年王命尹氏策命晉侯為侯伯文十四年王使尹氏訟周公于晉成十六十七年尹武公會諸侯伐鄭昭二十三年尹氏立王子朝則尹氏世執朝權為周亂階家父所刺在幽王之世則威福下移之始也

有國者不可以不慎辟則為天下僇矣

節讀為截辟讀為解僇與戮同

詩小雅節南山之篇節截然高大貌師尹周太師尹氏也具俱也辟偏也言在上者人所瞻仰不可不謹若不能絜矩而好惡

徇於一己之偏則身弑國亡爲天下之大戮矣

詩云殷之未喪師克配上帝儀監于殷峻命不易

書蔡氏集傳殷在河南偃師按今河南府有偃師縣其地有成湯陵相傳所謂西亳者是也一統志云契父帝嚳所都湯自商上遷焉後盤庚亦徙都於此改號曰殷周氏曰商人稱殷自盤庚始詩名物疏古今言殷地皇甫謐張守節蔡沉之徒皆以爲卽偃師王伯厚地里考引括地志云相州安陽縣本盤庚所都卽北冢殷墟南去朝歌城百四十里竹書紀年盤庚自奄遷北冢曰殷墟南去鄴四十里則又以今彰德府安陽縣爲西亳未詳孰是

道得衆則得國失衆則失國

喪去聲儀詩作宜峻詩作駿易去聲

詩文王篇師衆也配對也配上帝言其爲天下君而對乎上帝也監視也峻大也不易言難保也道言也引詩而言此以結上文兩節之意有天下者能存此心而不失則所以絜矩而與民同欲者自不能已矣

是故君子先慎乎德有德此有人有人此有土有土此有財有財此有用

〔說文〕土地之吐生物者也二象地之下地之中物出形也〔書禹貢〕冀州厥土惟白壤兗州厥土黑墳青州厥土白墳徐州厥土赤埴墳厥貢惟土五色揚州荊州厥土惟塗泥豫州厥土惟壤下土墳埴梁州厥土青黎雍州厥土惟黃壤〔禮王制〕冢宰制國用必於歲之杪五穀皆入然後制國用用地小大視年豐耗以三十年之通制國用量入以爲出祭用數之仿國無九年之蓄曰不足無六年之蓄曰急無三年之蓄曰國非其國也三年耕必有一年之食九年耕必有三年之食以三十年之通雖有凶旱水溢民無菜色〔周禮〕天官冢宰以九式均節財用一曰祭祀之式二曰賓客之式三曰喪荒之式四曰羞服之式五曰工事之式六曰幣帛之式七曰芻秣之式八曰匪頒之式九曰好貢之式以九貢致邦國之用一曰祀貢二曰嬪貢三曰器貢四曰幣貢五曰財貢六曰貨貢七曰服貢八曰旂貢九曰物貢

先慎乎德承上文不可不謹而言德卽所謂明德有人謂得衆有土謂得國有國則不患無財用矣

德者本也財者末也

本上文而言

外本內末爭民施奪

人君以德爲外以財爲內則是爭鬪其民而施之以劫奪之教也蓋財者人之所同欲不能絜矩而欲專之則民亦起而爭奪矣

是故財聚則民散財散則民聚

外本內末故財聚爭民施奪故民散反是則有德而有人矣

是故言悖而出者亦悖而入貨悖而入者亦悖而出

悖布內反

說文貨貝而寶龜貝海甲蟲也周而有泉至秦廢貝行泉

悖逆也此以言之出入明貨之出入也自先慎乎德以下至此

又因財貨以明能絜矩與不能者之得失也

康誥曰惟命不于常道善則得之不善則失之矣

道言也因上文引文王詩之意而申言之其丁寧反覆之意益深切矣

楚書曰楚國無以爲寶惟善以爲寶

史記楚世家楚之先祖出自帝顓頊高陽高陽生稱稱生卷章卷章生重黎重黎爲帝嚳高辛居火正甚有功能光融天下帝嚳命曰祝融共工氏作亂帝嚳使重黎誅之而不盡帝乃誅重黎而以其弟吳回爲重黎後吳回生陸終陸終生子六人圻剖而產焉其少子曰季連周文王之時季連之苗裔孫曰鬻熊鬻熊子事文王蚤卒其子曰熊麗熊麗生熊狂熊狂生熊繹熊繹當成王之時舉文武勤勞之後嗣而封熊繹子楚蠻封以子男之田姓芊氏居丹陽說文寶珍也徐注爲人所保也管子玉起於禺氏金起於汝漢珠起於赤野先王爲其從遠且至之難故託用於其重以珠玉爲上幣黃金爲中幣刀布爲下幣國語楚語王孫圉聘于晉定公饗之趙簡子鳴玉以相問于王孫圉曰楚之白珩猶在乎對曰然簡子曰其爲寶也幾何矣曰未嘗爲

責楚之所責者曰觀射父能作訓辭以行事于諸侯使無以寡君爲口實又有左史倚相能道訓典以敘百物以朝夕獻善敗于寡君使寡君無忘先王之業又能上下說于鬼神順道其欲惡使神無有怨恫于楚國若諸侯之好幣具而加之以訓辭有不虞之備而皇神相之寡君其可以免罪於諸侯而國民保焉此楚國之實也若夫白珩先王之玩也何寶焉劉向新序雜事篇秦欲伐楚使使者往觀楚之寶器楚王問之召令尹子西而問焉曰秦欲觀吾之寶器吾和氏之璧隨侯之珠可以示諸對曰不知也召昭奚恤而問焉對曰此欲觀吾國得失而圖之不在寶器在賢臣珠玉玩好之物非寶重者王遂使昭奚恤應之昭奚恤發精兵三百人陳于西門之內爲東而之壇一南面之壇四西面之壇一秦使者至昭奚恤曰君客也請就上位東面令尹子西南面太宗子敖次之葉公子高次之司馬子反次之昭奚恤自居西面之壇稱曰客欲觀楚國之寶器楚國之所寶者賢臣也理百姓實倉廩使民各得其所令尹子西在此奉珪璧使諸侯解忿悁之難交兩國之歡使無兵革之憂太宗子敖在此守封疆謹境界不侵鄰國鄰國亦不見侵葉公子高在此理師旅整兵戎以當強敵提枹鼓以動百萬之衆所使皆趨湯火蹈白刃出萬死不顧一生之難司馬子反在此懷霸王之餘議辯治亂之遺風昭奚恤在此唯大國之所觀秦使者懼然無以對昭奚恤遂揖而去秦使者反言于秦君曰楚多賢臣未可謀也遂不伐楚按此節章句並未指實爲白珩之對卽所云

楚語亦只說是楚人之語耳非謂國語中之楚語也且國語是左邱明所述豈得云楚書乎鄭康成舊註亦云楚昭王時書並非指今國語故並錄於此

以備參考 註金玉附見

楚書楚語言不寶金玉而寶善人也

## 舅犯曰亡人無以為寶仁親以為寶

舅犯狐突之子狐偃晉獻公娶大戎狐姬生重耳狐偃其兄弟也左傳晉惠公卒懷公命無從亡人期期而不至無赦狐突之子毛及偃從重耳在秦弗召懷公執狐突曰子來則免對曰子之能仕父教之忠古之制也策名委貲貳乃辟也今臣之子名在重耳有年數矣若又召之教之貳也何以事君乃殺之偃從重耳過衛乞食於野人野人與之塊子犯曰天賜也稽首受而載之及齊齊桓公妻之有馬二十乘公子安之子犯謀醉而遣之醒以戈逐子犯後秦伯納重耳于晉及河子犯以璧授公子曰臣負羈縻從君巡于天下臣之罪多矣臣猶知之而况君乎請由此亡公子曰所不與舅氏同心者有如白水投其璧于河後周襄王有太叔之難出奔居鄭狐偃勸晉侯勤王初晉侯教其民二年欲用之子犯曰民未知義未安其居于是出定襄王入務利民民懷生矣將用之子犯曰民未知信未宣其用于是乎伐原以示之信民易資者不求豐焉明徵其辭公曰可矣子



犯曰民未知禮未生其共于是乎大蒐以示之禮作執秩以正其官民聽不惑而後用之城濮之戰于玉從晉師晉師退軍吏曰以君避臣辱也且楚師老矣何故退子犯曰師直爲壯曲爲老豈在久乎微楚之惠不及此退三舍避之所以報也背惠食言以亢其讎我曲楚直其敝素飽不可謂老我退而楚還我將何求若其不還君退臣犯曲在彼矣卒避三舍晉侯聞輿人之誦而疑子犯曰戰也戰而捷必得諸侯若其不捷表裏山河必無害也晉侯又夢與楚子搏楚子伏己而盪其腦是以懼子犯曰吉我得天而楚伏其罪我且柔之矣後果敗楚師史記參左傳晉文公姬姓名重耳獻公之子也獻公娶於賈無子烝於武公妾齊姜生太子申生娶大戎狐姬生重耳小戎子生夷吾伐驪戎得驪姬生奚齊其娣生卓子重耳自少好善年十七有賢士五人曰狐偃趙衰顓頊魏武子司空季子重耳自獻公爲太子時已成人矣獻公卽位重耳年二十一驪姬嬖欲謀立奚齊故使重耳居蒲城既獻公殺太子申生使宦者寺人披趣殺重耳重耳踰牆宦者斬其衣袪重耳遂奔狄狄其母國也是時重耳年四十三賢士五人從亡其餘不名者數十人狄伐虜咎如獲其二女叔隗季隗以季隗妻重耳生伯儵叔劉居狄五年而獻公卒里克殺奚齊卓子使人迎重耳重耳疑畏不敢入乃更迎夷吾於梁立之是爲惠公惠公畏重耳謀欲殺之重耳聞之乃謀於趙衰等曰始吾奔狄非以爲可用興以近易通故且休足休足久矣固願徙之大國夫齊桓公好善志在霸王收恤諸

侯今聞管仲隰朋死此亦欲得賢佐盍往乎將行謂季隗曰待我二十五年不來而後嫁季隗泣曰我二十五年矣又如而是而嫁則就木焉請待子處狄十二年而行過衛衛文公不禮焉及齊齊桓公妻之畱齊凡五年趙衰舅犯乃於桑下謀行冀妾在桑上聞之以告姜氏姜氏殺之而謂重耳曰子有四方之志其聞之者吾殺之矣重耳曰無之姜曰行也懷與安實敗名重耳不可姜與子犯謀醉而遣之及曹曹共公聞其駢脅欲觀其裸浴薄而觀之僇負羈之妻曰吾觀晉公子之從者皆足以相國若以相夫子必反其國反其國必得志於諸侯得志於諸侯而誅無禮曹其首也子盍蚤自貳焉乃饋盤飧寘璧公子受飧反璧及宋宋襄公贈馬二十乘及鄭鄭文公亦不禮焉叔詹諫曰臣聞天之所啟人弗及也晉公子有三焉男女同姓其生不蕃晉公子姬出也而至於今一也離外之患而天不靖晉國殆將啟之二也有三士足以上人而從之三也晉鄭同儕其過子弟固將禮之况天之所啟乎弗聽及楚楚子嬰之曰公子若反晉國則何以報不穀對曰子女玉帛則君有之羽毛齒革則君地生焉其波及晉國者君之餘也其何以報君曰雖然何以報我對曰若以君之靈得反晉國晉楚治兵遇於中原其辟君三舍若不獲命其左執鞭弭右屬囊鞬以與君周旋子玉請殺之楚子曰晉公子廣而儉文而有禮其從者肅而寬忠而能力晉侯無親外內惡之吾聞姬姓唐叔之後其後衰者也其將由晉公子乎天將興之誰能廢之違天必有大咎乃送諸秦秦穆公納

女五人懷羸與焉初惠公負秦約爲秦所獲以太子圉爲質於秦秦以女妻之是爲懷羸及子圉亡歸晉而懷羸在秦至是乃以妻重耳懷羸奉匭沃盥旣而揮之怒曰秦晉匹也何以卑我公子懼降服而囚他日公享之公子賦河水公賦六月趙衰曰重耳拜賜公子降拜稽首公降一級而辭焉衰曰君稱所以佐天子者命重耳重耳敢不拜秦穆公納重耳於晉濟河圍令狐入桑泉取曰衰懷公遣使距之於廬柳秦伯使公子絳如晉師退軍于郇狐偃及秦晉之大夫盟于郇公子遂入曲沃朝于武宮殺懷公于高梁呂卻畏逼將焚公宮而弑晉侯寺人披請見公使讓之且辭焉曰蒲城之役君命一宿汝卽至其後余從狄君以用渭濱汝爲惠公來求殺余命汝三宿汝中宿至雖有君命何其速也夫祛猶在汝其行乎對曰臣謂君之入也其知之矣若猶未也又將及難君命無貳古之制也除君之惡惟力是視蒲人狄人余何有焉今君卽位其無蒲狄乎公見之以難告晉侯潛會秦伯於王城旣而公宮果火呂甥卻芮不獲公乃如河上秦伯誘而殺之晉侯逆夫人羸氏以歸秦伯送衛於晉三千人實紀綱之僕

舅犯晉文公之舅狐偃字子犯亡人文公時爲公子出亡在外也仁愛也事見檀弓

禮檀弓晉獻公之喪秦穆公使人弔公子重耳且曰寡人聞之亡國恒於斯得國恆於斯雖吾子儼然在憂服之中喪亦不可久也時亦不可失也孺子其圖之以告舅犯舅犯口孺子其辭焉喪人無寶仁親以爲寶父死之謂何又因以爲利而天下其孰能說之孺子其辭焉公子重耳對客曰君患弔亡臣重耳身喪父死不得與於哭泣之哀以爲君憂父死之謂何或敢有他志以辱君義稽顙而不拜哭而起起而不私子顯以致命於穆公穆公曰仁夫公子重耳夫稽顙而不拜則未爲後也故不成拜哭而起則愛父也起而不私則遠利也按檀弓本人姓名魯之知禮者以篇首有檀弓二字故以名篇

此兩節又明不外本而內末之意

秦誓曰若有一个臣斷斷兮無他技其心休休焉其如有容焉人之有技若己有之人之彥聖其心好之不啻若自其口出寔能容之以能保我子孫黎民尙亦有利哉人之有技媚疾以惡之人之彥聖而違之俾不通寔不能容以不能保我子孫黎民亦曰殆哉

个古賀反書作介  
斷丁亂反媚音冒

史記秦本紀秦之先帝顓頊之苗裔孫曰女修女修織元鳥墮  
卵女修吞之生子大業大業取少典之子曰女華女華生大費  
與禹平水土佐舜調馴鳥獸多馴服是為柏翳即伯益賜姓贏  
氏其後中潯居西戎保西垂六世孫大駱生非子居犬丘好馬  
及畜善養息之夫丘人言之周孝王孝王召使主馬於汧渭之  
間馬大蕃息孝王曰昔柏翳為舜主畜畜多息故有土賜姓贏  
今其後世亦為朕息馬朕其分土為附庸邑之秦使復續贏氏  
祀號曰贏秦漢書地理志秦地東井與鬼之分野也其界自宏  
農故闕以西京兆扶風馮翊北地上郡西河安定天水隴西南  
有巴蜀廣漢犍為武都西有金城武威張掖酒泉敦煌又西南  
有牂柯越雋益州皆屬焉自井十度至柳三度謂之鶉首之次  
秦之分也左傳僖公三十年晉侯秦伯圍鄭已而秦伯與鄭人  
盟使杞子逢孫揚孫戍之三十二年杞子自鄭使告于秦曰鄭  
人使我掌其北門之管若潛師以來國可襲也穆公問蹇叔曰  
里奚二人對曰不可穆公不聽遣孟明視西乞術白乙而將兵  
行兵至滑鄭賈人弦高以十二牛犒師秦三帥相謂曰鄭已覺  
之往無及已滅滑滑晉之邊邑也晉襄公發兵遮于殽擊之大  
敗秦師獲二帥後穆公悔不用蹇叔百里奚之言警告羣臣史  
錄為篇是為秦誓書大禹謨禹乃會羣后誓于師  
傳誓戒也軍旅曰誓說文口人所以食也象形

秦誓周書斷斷誠一之貌彥美士也聖通明也

大學集說啟蒙此聖字止于通

明之一端卽周禮六德知仁聖之聖

尙庶幾也媚忌也違拂戾也殆危也

### 唯仁人放流之逆諸四夷

禮王制東方曰夷被髮文身有不火食者矣南方曰蠻雕題交趾有不火食者矣西方曰戎被髮衣皮有不粒食者矣北方曰狄衣羽毛穴居有不粒食者矣風俗通東方謂之夷者東方人好生萬物無觸地而出夷者無也其類有九種一曰元菟二曰樂浪三曰高驪四曰滿飾五曰鳧夷六曰索家七曰東屠八曰倭人九曰天鄙南方曰蠻者君臣同川而浴極爲簡慢蠻者慢也其類有八一曰天竺二曰毘舍三曰儋僂四曰跋踵五曰穿胃六曰儋耳七曰狗軼八曰獬脊西方曰戎者斬伐殺生不得其中戎者兇也其類有六一曰僂夷二曰戎夷三曰老白四曰耆羌五曰鼻息六曰天剛北方曰狄者父子叔嫂同穴無別狄者辟也其行辟邪其類有五一日月支二日穢貊三日匈奴四曰單于五曰白屋

### 不與同中國此謂唯仁人爲能愛人能惡人

逆讀爲屏古字通用

逆猶逐也言有此媚疾之人妨賢而病國則仁人必深惡而痛

絕之以其至公無私故能得好惡之正如此也

見賢而不能舉舉而不能先命也見不善而不能退退而不能遠

過也

命鄭氏云當作慢程子云當作息未詳孰是遠去聲

若此者知所愛惡矣而未能盡愛惡之道蓋君子而未仁者也

好人之所惡惡人之所好是謂拂人之性菑必逮夫身

菑古灾字夫音扶

拂逆也好善而惡惡人之性也至於拂人之性則不仁之甚者

也自秦誓至此又皆以申言好惡公私之極以明上文所引南

山有臺節南山之意

是故君子有大道必忠信以得之驕泰以失之

君子以位言之道謂居其位而修己治人之術發己自盡爲忠循物無違謂信驕者矜高泰者侈肆此因上所引文王康誥之

意而言章內三言得失而語益加切蓋至此而天理存亡之幾

決矣

生財有大道生之者衆食之者寡爲之者疾用之者舒則財恒足

矣

恒胡登反

呂氏曰

宋史列傳呂大臨字與叔藍田人登進士第歷太常博士秘書省正字學于程頤與謝良佐游酢楊時號四先生通六經尤達于禮解中庸大學等篇每欲掇習三代遺文舊制令可行不爲空言以拂世矯俗有克己銘考古圖及玉瑛集等書范祖禹薦其好學修身如古人可備勸學未及用而卒

國無遊民

禮王制無曠土無遊民

則生者衆矣朝無幸位

荀子朝無幸位民無幸生楊倞

注無德而祿謂之幸位

則食者寡矣不奪農時則爲之疾矣量入爲出

禮王

制量入以爲出

則用之舒矣愚按此因有土有財而言以明足國之道



在乎務本而節用非必外本內末而後財可聚也自此以至終篇皆一意也

仁者以財發身不仁者以身發財

發猶起也仁者散財以得民不仁者亡身以殖貨

書仲虺之誥不殖貨利集傳殖聚也

未上有好仁而不好義者也未有好義其事不終者也未有府庫財非其財者也

左傳疏府寶藏貨賄之處庫軍馬兵甲之處禮曲禮在府言府在庫言庫周禮天官大府掌九貢九賦九功之貳以受其貨賄之入頒其貨於受藏之府頒其賄于受用之府凡官府都鄙之吏及執事者受財用焉玉府掌王之金玉玩好兵器凡良貨賄之藏內府掌受九貢九賦九功之貨賄良兵器以待邦之大用外府掌邦布之人出以共百物而待邦之用禮曲禮天子之六府曰司土司木司水司草司器司貨典司六職釋名庫舍也言物所在之舍也說文庫兵車所藏也府文書所藏也蔡邕月

令章句一曰車庫二曰兵庫三曰祭器庫四曰樂器庫五曰宴器庫商子湯武破桀紂天下大定築五庫藏五兵禮月令仲春之月令百工審五庫之量金鐵皮革筋角齒羽箭幹脂膠丹漆母或不良

上好仁以愛其下則下好義以忠其上所以事必有終而府庫之財無悖出之患也

孟獻子曰畜馬乘不察於雞豚伐冰之家不畜牛羊百乘之家不畜聚斂之臣與其有聚斂之臣寧有盜臣此謂國不以利爲利以義爲利也畜許六反乘斂並去聲

孟獻子魯之賢大夫仲孫蔑也

諡法解聰明獻哲曰獻知質有聖曰獻春秋氏族譜獻子虔父之會孫文伯之子左傳宣公九年王徵聘于魯公使獻子如周聘王以爲有禮厚賄之十四年楚圍宋獻子言于公曰臣聞小國之免于大國也聘而獻物于是有庭實旅百朝而獻功于是有容貌采章嘉淑而有加貨謀其不免也誅而薦賄則無及也今楚在宋君其圖之公說成公十三年公如周

朝王獻子爲介王說獻子賜之加厚從公會晉侯及諸侯之  
師伐秦獻子謂公曰首帥乘和師必有大功晉果敗秦于麻  
隧十八年冬獻子會晉侯及諸侯盟于虛桓謀救宋也襄公  
也獻子曰請城虎牢以逼鄭冬遂城虎牢三年公如晉盟于  
長樛獻子相公稽首知武子曰天子在而君辱稽首寡君懼  
矣獻子曰以敝邑介在東表密邇仇讎寡君將君是望敢不  
稽首四年公如晉聽政晉侯享公公請屬郇晉侯不許獻子  
曰以寡君之密邇仇讎而顧同事君無失官命郇無賦于司  
馬爲執事朝夕之命敝邑敝邑竭小國而爲罪寡君是以願  
借助焉晉侯許之新序獻子聘于晉宣子觴之三徒鍾石之  
懸不移而具獻子曰富哉家宣子曰子之家與我孰富獻子  
曰吾甚貧惟有二士曰顏回茲無靈者使我邦家安平百姓  
協和惟此二者耳獻子出宣子曰彼君子也以養賢爲富我  
鄙人也以鍾石金玉爲富左傳宋向戌來聘見獻子尤其室  
曰子有令聞而美其室非所望也對曰我在晉我兄爲之毀  
之重勞且不敢問禮檀弓獻子禪懸而不樂比御而不入孔  
子曰獻子加于人一等矣又獻子之喪司徒旅歸四布夫子  
也

畜馬乘士初試爲大夫者也

孔氏疏按書傳士飾車駢馬詩云四牡駢駢大夫以上乃得乘四馬故知士初試爲大夫者也春秋說題辭地精爲馬十月二月而生應陰紀陽以合地故人駕馬任重致遠利天下月度疾故馬善走春秋考異郵陰合於八八合陽九八九七十七二爲地地主月月精爲馬月數十二故馬十二月而生碑雅馬一歲曰駟又曰駟二歲曰駟三歲曰駟八歲曰駟馬八歲一變故從八也周禮校人掌王馬之政辨六馬之屬種馬一物戎馬一物齊馬一物道馬一物田馬一物駕馬一物又曰馬八尺以上爲龍七尺以上爲駮六尺以上爲馬爾雅雞大者爲蜀蜀子雞未成雞曰健絕有力奮雞三尺爲鷩鷩子代爲桀桀垣而棲爲鷩春秋說題辭雞爲積陽南方之象火陽精物炎上故陽出雞鳴以類感也雞之爲言佳也佳而起爲人朝暮寶也韓詩外傳田饒謂魯哀公曰夫雞平頭戴冠者文也足搏距者武也敵在前敢鬪者勇也見食相告者仁也守夜不失時者信也雖有五德猶曰冰而食之者何也以其所來近也禮曲禮祭宗廟之禮雞曰翰音爾雅豕子豬豬積么幼奏者豕豕生三豕二師一特所寢櫨四踰皆白豕其迹刻絕有力豕化豕注豕高五尺者爲豕說文牡豕謂之豬小豕謂之豚化豕謂之豕又曰殺小豚也豕豚生三月也豕豚生六月也何承天纂文梁州以豕爲豬河南謂之豕吳楚謂之豕漁陽以豬爲豕齊徐以小豬爲豕豕白豕黑頭也豕豕奏毛也禮曲禮凡祭宗廟之禮豕曰剛鬣豚曰臠肥

伐冰之家卿大夫以上喪祭用冰者也

禮月令孟冬水始冰地始凍仲冬冰益壯地始坼季冬冰方盛水澤腹堅命取冰孟春東風解凍魚上冰仲春天子乃獻羔開冰先薦寢廟喪大記君設大盤造冰焉大夫設夷盤造冰焉士併瓦盤無冰設床積第有枕造冰盛冰無冰用水也灌袒也冰在下設床於上去席而袒露第簀使寒氣得通免腐壞也周禮天官凌人掌冰正歲十有二月令斬冰三其凌春始治鑿凡內外饗之膳羞鑑焉凡酒漿之酒醴亦如之祭祀共冰鑑賓客共冰大喪共夷盤冰夏頒冰掌事秋刷左傳昭公四年申豐曰古者日在北陸而藏冰西陸朝覲而出之其藏冰也深山窮谷固陰近寒於是乎取之其出之也朝之祿位賓食喪祭于是乎用之其藏之也黑牡巨豕以享司寒其出之也桃弧棘矢以除其災其出入也時食肉之祿冰皆與焉大夫命婦喪浴用冰祭寒而藏之獻羔而啟之公始用之火出而畢賦自命夫命婦至於老疾無不受冰山人取之縣人傳之輿人納之隸人藏之夫冰以風壯而以風出其藏之也周其用之也徧則冬無愆陽夏無伏陰春無凄風秋無苦雨雷出不震無災霜雹癘瘥不降民不夭札今藏川池之冰棄而不用風不越而殺雷不發而震雹之爲災誰能禦之七月之卒章藏冰之道也說文牛大牲也琿雅牛土畜也馬火畜也土緩而和火性健燥故易坤爲牛乾爲馬牛病則耳

燥安則溫潤而澤故古之視者以耳祭義所謂牛毛尚耳是也周禮牛人掌養國之公牛以待政令祭祀共享牛求牛賓客其饋饌牛軍事共犒牛喪事共奠牛軍旅共兵車之牛禮曲禮祭宗廟之禮牛曰一元大武爾雅羊牡粉牝牝夏羊牡獮牝殺角不齊觮角三脊獮羊黃腹未成羊羴絕有力奮卑雅羊性善羣母成羣則以一雄為主舉羣聽之今所謂壓羣是也北人謂之羊頭羊性前逆牛性前順故羊宜驅而牛宜牽羊性畏露曉出而早歸春秋繁露凡贊卿用羔有角而不用類仁者執之不鳴殺之不鳴類死義者飲其母必跪乳類知禮者故以為贊禮曲禮祭宗廟之禮羊曰柔毛

### 百乘之家

司馬法六尺為步步百為畝畝百為夫夫三為屋屋三為井井十為通通十為成成方十里成十為終終十為同同方百里同十為封封十為畿畿方千里一同百里提封萬井定出賦六千四百井戎馬四百疋兵車百乘此卿大夫采地之大者也為百乘之家

### 有采地者也

禮禮運大夫有采以處其子孫漢志註采官也因官食邑故曰采地本作採通作采

君子寧亡己之財而不忍傷民之力故寧有盜臣而不畜聚歛之臣此謂以下釋獻子之言也

長國家而務財用者必自小人矣彼爲善之小人之使爲國家蓄害並至雖有善者亦無如之何矣此謂國不以利爲利以義爲利也

長上聲彼爲善之此句上下疑有闕文誤字

管子心全乎中形全乎外不逢天災不遇人害謂之聖人按此則蓄爲旱乾水溢之類害爲盜賊亂竊之類

自由也言由小人導之也此一節深明以利爲利之害而重言以結之其丁寧之意切矣

### 右傳之十章釋治國平天下

此章之義務在與民同好惡而不專其利皆推廣絜矩之意也能如是則親賢樂利各得其所而天下平矣

凡傳十章前四章統論綱領指趣後六章細論條目工夫其  
第五章乃明善之要第六章乃誠身之本在初學尤爲當務  
之急讀者不可以其近而忽之也